

東
華
續
錄

東華續錄

嘉慶四十五

臣王先謙敬編

臣周曾蕃恭校

嘉慶二十三年戊寅春正月庚子調德文爲禮部右侍郎多福爲

盛京戶部侍郎以明興阿爲盛京工部侍郎

由左副都御史遷

○辛丑諭

文甯係棄瑕錄用之人復擢至巡撫由貴州調任河南乃一入豫

境沿途挑斥供應縱容家人需索站規實屬溺職文甯著卽照部

議革職○壬寅定盛京大凌河墾種牧地額賦○廓爾喀額爾德

尼王熱尊達爾畢噶爾瑪薩野遣使貢方物賜敕賞賚如例○甲

辰諭軍機大臣等盛京奉祀陵寢諸宗室向遇東巡恭謁祖

陵均有接駕送駕之例因念前歲移駐盛京諸宗室乃緣支系蕃

衍靳其居業嚮善盛京爲國家根本之地習尙敦龐移居到彼爲

之築室昇產以養以教使之觀感善俗興起才俊並非獲有罪辜
移徙安置也本年朕親蒞陪京自當令其一體接駕酌予恩施著
富俊等詢問該宗室人等其平日所習於文武兩途各述所長習
次者或能文能詩及通曉繙譯習武者或能騎射步射豫先報名
屆期當加以校閱分別獎勵其接駕處所應與奉祀 陵寢諸宗
室各爲一班著富俊等擬定地界居期傳知遵照迎送再歷屆奉
祀 陵寢諸宗室均係如何施恩賞賚見在移駐諸宗室每年給
餉若干每戶分產若干一併查明分別繕寫清單並酌擬章程於
啓鑒以前五六月間詳細具奏至宗室內有因獲罪發往盛京管
束及國禁者並著查明原犯案由及原定年限另繕清單具奏以
備屆時酌予恩宥○丙午 上以來歲 六旬萬壽詔舉恩科鄉
會試○戊申諭軍機大臣等松筠奏敬陳感懷下忱一摺松筠自

到察哈爾都統任不過半年先請添設前鋒參領加給協領翎支繼又無故請賞牧羣官兵銀兩嗣又請將每歲行國馬匹改給贏價三次陳奏皆屬沽名邀譽窒礙難行不思國家自有定制豈可輕議更張如果利弊攸關有必應調劑之事朕早不吝恩施卽前任大員亦必先行計及何待伊言松筠所至之區惟自知沽名市惠取悅下人而不顧事之難行一經飭駁卽使怨歸於上若共事者從而阻止亦必爲歛謗所叢松筠所行如此是何居心禮記云善則稱君過則歸己則民作忠不學無術者未足與言著傳諭松筠伊在任惟當率由舊章不准再行妄言調劑務痛改前非以收桑榆之效戒之勿貽重咎○甲寅諭大學士明亮自乾隆年間屢歷戎行著有勞績經朕簡拙綸扉見年八十有四精神矍鑠步履強健若令節勞頤養必更益壽延齡長資倚任明亮著不必

分日赴內閣閱本每日本章著曹振鏞戴均元章煦三人輪流閱
看明亮見兼內大臣亦不必進內值班其所管兵部事務遇有奏
事間一二次不到亦可引見官員明亮無庸承旨卽交和甯等帶
領用示朕優眷耆臣之意○庚申以方體爲湖北按察使由江蘇
道○乙丑諭主位之母家如高斌縕布花沙布等已入滿洲旗分
俱會各賞滿洲姓氏書寫矣惟 玉牒內 孝儀純皇后慧賢皇
貴妃淑嘉皇貴妃之母家姓氏仍以單字書寫著交宗人府於
玉牒內 孝儀純皇后之母家皆寫魏佳氏慧賢皇貴妃之母家
書寫高佳氏淑嘉皇貴妃之母家書寫金佳氏

二月庚午命協辦大學士吏部尙書戴均元兵部尙書和甯軍機
處行走○實授恒敏陝西按察使○乙亥大學士董誥以疾乞致
仕允之予食全俸○己卯張五緯緣事革職以溫承惠爲山東按

察使

由刑部
郎中選

○庚辰

上御經筵

○諭從來人君日理萬幾孜孜

圖治復於聽政之暇宣講經書以資啓沃二事並行不相妨礙
惟 聖祖仁皇帝經筵日講無間寒暑後始改於春秋二仲舉行
本日朕臨御經筵六部九卿八旗俱無陳奏事件甚屬非是此次
姑免查究嗣後每遇經筵之日除不帶領引見外各部院八旗內
務府均著照常奏事毋許曠怠違旨偷安定行懲治不貸○諭昨
據步軍統領衙門奏英綬家人達罕呈出素識之直隸都司余國
柄書信申敘孥獲教匪該省承審各官有意開脫並託達罕向部
吏轉託題升遊擊等語達罕係英綬家人當伊呈出書信時英綬
應卽自行具摺奏聞請旨查辦此事與步軍統領衙門毫無干涉
乃英綬先持與英和閱看商同聯銜具奏大屬非是從前福勒洪
阿於所管護軍假冒官職伊自行訪出後並不據實奏聞移交英

和查辦當將福勒洪阿降爲二等侍衛派往新疆換班英綬本應卽照福勒洪阿之例懲治但念勒保年老篤疾朕格外施恩英綬著革退內閣學士並護軍統領止留副都統及右翼總兵逐出乾清門仍交部議處用示薄懲以觀後效○辛巳 御試翰林詹事等官擢潘錫恩等五人爲一等餘升黜留任有差○諭英和等奏請交部察議一摺國家建立大臣分理庶政凡本衙門公事必應公同商酌聯銜具奏如意見不合亦准兩議具奏候朕定奪若遇有控訴呈詞由一人接收者但事關公務均當與眾堂官公商具奏不過於摺內聲敘係由何人交出方合同寅協恭之義如一人接收卽自行專摺陳奏轉爲錯誤至若事與該管衙門無涉而必應奏聞則何人接收卽由何人具奏豈得援引同官會商入告此次英綬家人達罕呈出直隸都司余國柄書信一事信內如或牽

涉番役則英和等聯銜具奏朕必不加責因其事與步軍統領衙門毫無干涉英綬先持與英和閱看英和令司員商同那彥寶聯名具奏實屬舛誤是以將英綬懲處在英和不必有心干與事外而一二無識之徒遇事卽向英和商辦久之相習成風英和必至因此獲咎豈非適以害之朕杜漸防微不能不遠慮及此明白曉諭俾眾咸知其此次英和那彥寶自請察議之處俱著加恩寬免嗣後各大臣當倍加謹慎如事非職任所司輒有私向商議者悉皆嚴詞拒絕毋爲越畔之行用副朕訓誡成全至意○甲申諭向來蒙古風氣淳樸遇有過犯情節本不甚重是以蒙古條例較刑律爲輕近來內地無賴游民潛赴蒙古地方引誘蒙古人肆行不法盜劫之案日多嗣後蒙古人犯事如無民人在內者仍照蒙古例辦理若案內有一民人均照刑律問擬著理藩院通行傳諭各

蒙古部落俾知儆戒○乙酉諭昨日召見果齊斯歡詢問四阿哥
功課據果齊斯歡奏稱甫學屬對詩文俱未能作朕前在藩邸時
十一歲卽能屬對十二歲卽能賦詩壬辰十三歲時 皇考高宗
純皇帝命面和 聖製五言律七言律詩味餘書室詩集中卽載
有朕十三歲詩章四阿哥質性聰明儘可讀書本年已十四歲詩
文尙俱未學皆由果齊斯歡學問平常不能循循善誘而又因循
疲玩以致耽誤果齊斯歡負恩已極著革去一應差使俾上書房
師傅共知儆戒所有四阿哥師傅著大學士會同翰林院掌院學
士在翰林中選擇品學兼優者三人帶領引見候朕簡用未經引
見以前著陳官俊暫行授讀○調德文爲工部左侍郎以哈爾阿
爲禮部右侍郎由內閣學士遷○丙戌以奕經爲內閣學士由奉宸苑卿遷○丁
亥以和桂爲左副都御史由通政使遷○己丑 上閱火器營兵○癸

已諭朕五旬誕辰曾降旨不准進獻玩好來年六旬正誕督撫等情殷祝嘏因朕壽登周甲或欲加意增華惟是吏治未醇民俗未正方抱愧之不暇况朕敦崇節儉出於本性來年並不舉行慶典除應進土貢外所有金珠玉器槩不准呈進其各懷遵用副朕諄誠○諭刑部奏蒙古搶劫之案有民人在內者請先令承審官分別是劫是搶照刑律強盜各條及搶奪攔搶各條分別治罪似此引例紛繁轉滋淆混正所謂科條既備民多僞態無所措手足矣嗣後蒙古地方搶劫案件如俱係蒙古人專用蒙古例俱係民人專用刑律如蒙古與民人夥同搶劫覈其罪名蒙古例重於刑律者蒙古與民人俱照蒙古例問擬刑律重於蒙古例者蒙古與民人俱照刑律問擬著爲令○調伊什扎木素爲浙江布政使以楊懋恬爲江蘇布政使

病痊布政使

三月戊戌朔諭直省督撫大吏不准以屬員幫辦幕務屢經降旨
有李丁等身任臬憲奏展優厚非不能延請幕友者乃令見任
通判陳建入幕辦事既曠職守又招物議實屬違制本應照部議
降調不准抵銷姑念一時簡用乏人方受囑著加恩改爲降四級
留任○己亥 上親耕藉田○庚子 上啓鑾謁 西陵○免經
過地方額賦十分之三○壬寅 上幸南苑行圍○戊申 上臨
慧愍固倫公主園寢賜奠○輸五公主著追封爲慧安和碩公主
同慧愍固倫公主著弘善製造牌位二座其歲時致祭禮儀該衙
門照例辦理○己酉 上謁 泰陵 泰東陵至 孝淑皇后陵
奠酒回鑾○庚戌命章煦爲文淵閣大學士兼管刑部○調戴聯
奎爲兵部尙書以汪廷珍爲禮部尙書吳芳培爲左都御史周系
英爲吏部右侍郎

署兵部
左侍郎

○丙辰雲南臨安邊外夷匪高老五等

糾眾滋事命伯麟等剿之○丁巳 上閱健銳營兵○戊午 上
還京師○庚申 上詣 黑龍潭祈雨○辛酉諭軍機大臣等蔣
攸銛奏遵旨按款確查將辦理情形覆奏一摺逆酋洛布七力前
據卓秉恬奏並未焚斃且有戕害上瞻對頭人格格賊寨之事是
以降旨令蔣攸銛查明具奏昨據賽冲阿面奏伊在川時亦聞知
洛布七力潛逃未斃事定後復回巢穴向上下瞻對索取地土人
戶與卓秉恬所奏大略相同因復降旨交該督確實訪查此次該
督拜摺時尙未奉到續降諭旨據奏查得洛布七力焚斃之處止
有該酋常用之鐵馬鞍烏槍及手帶之鑲珊瑚金戒指爲憑其時
賊體焦爛無從辨認番眾僉稱洛布七力實已焚斃見據派往道
將密訪得二十年勦平中瞻對將地土分給上下瞻對復有洛布
七力尙存向上瞻對索還地方彼此忿爭而去此後七力滾亦未

再來滋事上瞻對則恐其復向尋釁時常準備逐細查訪不能得
洛布七力實在蹤迹至格格絨泰其人見存並未被告是卓秉恬
所奏洛布七力復出戕害格格絨泰之語係屬傳聞不確惟洛布
七力是否焚燬迄無確據該督仍當遵照續奉諭旨再行訪查此
事必須將七力滾拏獲訊明始能辨別真偽七力滾雖屬野番往
來無定但前既有向上瞻對尋釁之事亦難保其不再前來蔣攸
銓當設法偵伺購索如能將七力滾擒拏到案確切供明洛布七
力實已焚燬再將七力滾治其妄索土地之罪則羣疑盡釋方能
杜傳謠之口該督務勉力辦理不可顛預了事○以那清安爲內
閣學士由詹事遷○癸亥諭向來新科一甲進士適屆大考翰詹之年
以該員等尙在庶常館教習未經散館皆不就試及考試試差則
以已經授職爲辭一體與考事屬兩歧該員等既不與大考之列

則考差亦不應與試著自此次爲始凡一甲進士未散館者遇考試試差時亦無庸與考以歸畫一○甲子撥京倉麥一萬石於大興宛平二縣平糶

夏四月戊辰朔日有食之○乙亥酉刻京師風霾○丙子諭昨日酉初三刻有暴風自東南來俄頃之間塵霾四塞室中然燭始能辨色其象甚異朕心震懼惕思上蒼示儆之因稽諸洪範咎徵恒風爲蒙之象皆朕辦事不明用人不當之故或意存怠忽不能力勤或有下情不能上達者其政事之闕失無所匡正歟抑小民冤苦壅遏莫聞歟或內外大臣有奸佞傾邪而朕不及覺歟有言責者體朕遇災而懼之心其各屏除私意獻納忠言如朝廷所行之事有似前代秕政應行改革者卽剴切論列無有所隱下民橫被冤抑有覆盆莫白者亦據實直陳代爲昭雪其奸邪之病國虐

民者或摸棱巧宦旅進旅退者卽列款糾參如此則言者出於爲國之公心朕聽之卽爲應 天之實政若懷挾私意止便身謀又或造作無稽以洩私忿則顛倒黑白淆亂是非不特負朕求言之意更足以增晦蒙之象矣朕恐懼修省反復思維虛懷延訪內外大小臣工各當自省咎愆殫勸職業以副朕修德弭災之意○戊寅諭欽天監衙門職司占驗於星象風信休徵咎徵皆應據實入告近日該衙門節候占風多擇取吉祥語句聊以塞責昨初八日風霾之異朕心震懼遲至三日該衙門並未推占具奏所司何事此等異變竟不具奏豈專事諂媚以取悅於上乎真所謂尸厥官罔聞知昏迷於天象矣著卽詳考占經烈風之變見於四月者主何徵應全錄原文據實奏聞毋有所隱○諭給事中盧浙奏風沙示儆請禁緝捕員弁貪功冒賞擾累平民一摺所奏甚是十八年

逆案內祝現等六犯日久未獲朕所以降旨飭緝者原以除莠安良乃承緝之員不能報獲輒思以他犯塞責而番役兵丁等遂乘機肆虐或誣陷平民或藉報仇隙拖累無辜索擄財物及拏解到官審明昭雪而被害者業已家貲蕩盡形骸支離其覆盆之下因而殞命者又不知凡幾實屬可憫乾隆年間謀逆重案如馬朝柱段文經二犯逋逃未獲我皇考高宗純皇帝曾屢經降旨飭緝彼時承緝者並未於案內株連瓜蔓濫及多人迄今數十餘年餘燼寂然是卽前事之鑒今林清之案其首先謀叛之元惡大憝均已伏誅所必應緝獲明正典刑者亦惟有祝現等六人爲最要其餘各犯不過脅從況在疑似之間豈可徧行羅織害及良民著槩行停緝卽次要各犯亦止令刑部存記獲日再行辦理凡內外緝捕衙門惟各於境內嚴密偵訪六犯蹤迹必須訪有確據方可就

地擒拏獲日審明實係正犯仍從優獎賞若番役兵丁及白役人等再藉捕逆爲名將情涉疑似者妄行按拏或挾嫌指控以圖陷害則誣人爲叛逆者卽以叛逆之罪坐之或將被害之家財產搶劫者審明計贓治罪仍將該番役兵丁等家產鈔沒賞給被害之人其官弁中有貪功冒賞誣陷無辜者該管上司查出均嚴參一體治罪務俾善良得安以禁苛虐而除擾累將此通諭知之○己卯諭欽天監奏詳查 欽定天文正義內載天地四方昏濛若下塵雨不霑衣而土名曰霾故曰天地霾君臣乖大旱又爲米貴等語本月初八日暴風驟至塵土晦蒙與正義所載風霾之象相同朕詳思其義如前代君臣睽隔有天子不識宰相之面者不免乖離之象我朝 家法相承君臣一體朕恪遵 成憲每日召見羣臣躬親延訪前席周諮似與乖離者有別然諸臣中實與朕同心

望治者不過十之一二其餘召對時總以政治毫無闕失諛詞容
悅豈真以爲萬幾咸理無可拾遺補闕乎不敢面折退有後言回
護己之爵位罔恤政之得失所謂貌合而情睽卽是乖之義也卽
諸臣於同寮亦每心知其非不肯直言匡正坐視其失而不救甘
爲小人之同而不爲君子之和是亦所謂乖也嗣後當共矢忠誠
痛改前失以盡人事而感天和直告在廷勿負朕意○諭匿名訐
告最爲人心風俗之害其意本因挾有私嫌藉圖傾害一經查辦
不特所告之人枉受污讟並波及案外之人酷遭拖累以無名之
飛語令官司荼毒平民而陰謀者乃袖手旁觀以快其私忿其陰
惡之情甚於鬼蜮律載投隱匿名文書告言人罪者絞見者卽爲
燒毀若將送入官者杖八十官司受而爲理者杖一百被告者雖
實不坐立法至爲明切嗣後凡有拾獲匿名揭帖者著卽將原帖

銷毀不得具奏惟關繫國家重大事務者密行奏聞候旨密辦○
諭巡視五城御史審理詞訟稽查奸宄近在輦轂之下責任匪輕
必須品行端方聽斷明允者方爲稱職向來都察院遇有缺出一
槩列名請簡並不詳加遴選如蕭鎮之貪黷營私蔣詩之昏謬溺
職均有玷風紀之司嗣後巡城御史缺出著該堂官於科道內揀
選公正廉明者每一缺保奏一員帶領引見候朕簡用亦不必拘
定巡城次數該員一年任內妥協則已如有貪黷似蕭鎮者將原
保堂官交部嚴加議處昏謬似蔣詩者將原保堂官交部議處○
庚辰 上詣 黑龍潭祈雨○命刑部清釐庶獄○辛巳諭順天
府所屬州縣上年春閒被旱秋收亦復歉薄入冬雪澤優霑冀望
今歲麥收豐稔稍蘇民困乃三月無雨日來風日曠燥朕昨謁
黑龍潭祈雨蹕路經過之處所見麥田多未播種小民口食無資

所納租稅從何而出近郊如此各屬情形可想而知朕愛恤黎元
施恩惟恐不速著加恩將順天府屬二十四州縣本年應徵上忙
錢糧槩行蠲免其業經徵收者照例劃抵該府尹等卽出示曉諭
俾眾周知○壬午再撥京倉粟米一萬石於大興宛平二縣平糶
○癸未諭昨因風霾示儆朕降旨求言原冀聞政事之闕失下民
之冤苦令各言官據實直陳乃連日京堂御史中竟有三人以松
筠降謫之事爲言請仍召還內用者實屬莠言亂政矣上年松筠
陳奏阻止盛京調 陵大典朕欽遵 皇考高宗純皇帝聖訓宜
示其罪猶念其陳奏尙在未經明降諭旨以前曲從寬典僅革去
大學士降爲二品頂帶仍授以察哈爾都統一品職任此朕準情
示罰不得已之苦衷曾令松筠跪讀 聖訓松筠亦惶悚知罪並
無幾微負屈之意朕以松筠多年舊臣歲時賞賚無缺意欲俟一

二年後仍復召用乃該京堂御史等妄將此事牽引論列以應風
霾之異其言太覺支離荒謬松筠謫降係上年六月之事彼時何
以不見有眚災告儆且言者果以松筠爲屈抑又何以去年不交
章諫諍坐待今日乃爲此無稽之論況風霾之象專爲松筠必無
是理復召與否其權在上豈小臣所得干與耶是言者止意圖邀
名市惠而並不計及政體所關國家進退大臣功罪較然豈容逞
臆妄言撓朕黜陟之大柄此風斷不可長特明白宣諭言事諸臣
務各屏除偏見毋徇私好私惡以淆公是公非負朕虛懷納諫之
誠也○甲申諭御史王檢奏各直省審案遲延請遵清理庶獄恩
旨一體查辦一摺直省積案繁多以山東爲最甚本日據溫承惠
奏稱到任未及兩月接收呈詞已有四百餘件尙有歷任未結之
案四千餘件其弊由於知縣疲玩及該管之府州推諉見在勒限

審訊分別懲處直隸積案雖不若山東之多而地方缺兩亦應清理庶獄以迓祥和著直隸山東督撫卽飭所屬大小問刑衙門各將見審案件迅速審斷發落牽連犯證槩行查明省釋不得藉詞延宕其咨部展限之案一併清查審擬如有抗延不結據實劾參以徵怠玩○丁亥陳預以不能整頓地方降三品京堂調和舜武爲山東巡撫陳若霖爲河南巡撫以李鴻賓爲廣東巡撫

由署禮部右侍郎

○戊子

上詣

天神壇祈雨○己丑

皇后行躬桑禮○庚

寅免順天府屬二十四州縣旗租並緩徵逋賦○辛卯雨

五月戊戌朔諭朕前閱范祖禹唐鑑見其摘取有唐事蹟論列得失有裨治道因命館臣倣其義例作爲明鑑一書蓋以取鑑前代

其善政則因以爲法其秕政則用以爲戒亦卽殷監夏周監殷之意也昨日館臣呈進明鑑五冊於萬厯天啓閒載入我朝開創之

事後加按語頌語並論及前明用人不稱其職更爲誕妄矣我

祖宗開基遼瀋其事備載於 實錄 聖訓及 開國方略 豐

功 偉烈億禩光昭至明鑑乃係論列有明一代事借鑒得失非

若編年紀月事事臚列今以興朝之 隆業載入勝國卷中於體

例殊爲背謬如該總裁等豫行請旨朕必將不應編載之故早爲

指示乃並不奏明率行纂輯實屬冒昧所有該管總裁曹振鏞戴

均元戴聯奎秀甯俱著交部議處總纂官朱珔纂修易禧善張岳

崧俱著交部嚴加議處原書著發交該館另行纂輯進呈此數節

按語係何人所撰著軍機大臣查明先行具奏○諭陳預自簡任

山東巡撫以來漫無整頓從前和舜武程國仁分任藩臬時地方

積案漸清京控亦少迨伊二人升任後臬司張五緯不能稱職陳

預亦毫無振作吏治日形疲玩溫承惠接任臬司積案已有四千

餘件之多而來京控訴者仍絡繹不絕且滕縣高唐一帶驛路盜賊公然塗面執械搶奪商旅州縣並不認真緝捕但於驛店張貼告示禁止早行昨召見浙江藩司伊什扎木素具奏伊過東省時親見驛店告示沿途劫案頻聞行旅皆有戒心東省地方廢弛至於如此巡撫何所辭咎陳預豈能復勝京堂之任見在吏部因耶城縣捕役案賊上司不行參劾一案將陳預議以降調無級可降應行革任本應卽照部議革職姑念其由刑部司員出身於刑名尙爲熟習格外施恩陳預著以刑部郎中降補勉圖自效○癸卯諭吏部奏議處纂輯明鑑之總裁總纂纂修一摺朕前降旨命館臣纂輯明鑑一書其體例原全倣祖禹唐鑑乃館臣等意圖卷帙繁富以爲書成奏請議敘地步遂規倣通鑑輯覽敘次凡書內御批之關涉明代者全行恭載迨纂至萬曆天啓年間又不請

旨輒以與朝之 隆業載入勝國卷中以致按語措詞乖謬該總

裁等均有應得之咎此內秀甯係滿洲大員武不能教訓兵丁文不能纂編書史況於國朝事實尤宜加意審慎乃漫不留心其咎更重秀甯著降爲頭等侍衛前往新疆換班戴均元本有革職留任之案部議降三級調用無級可降著加恩仍改爲革職留任曹振鏞戴聯奎俱著加恩改爲降三級留任編修張岳崧撰擬按語論明憲宗用人不當已屬失辭又以熊廷弼比方李光弼尤爲紕繆著卽照部議革職易禧善纂輯明神宗朝事蹟按語頗揚本朝雖乖體例詞句尙無大謬著從寬改爲革職留任侍講朱珔此數卷按語皆非其所撰惟覆校時不爲改正亦屬疏忽著從寬降爲編修以示薄懲○轉廉善爲刑部左侍郎調穆彰阿爲刑部右侍郎明興爲兵部右侍郎以同麟爲盛京工部侍郎

由內閣學士遷

○甲辰

同麟以親老命留京補禮部右侍郎調多山爲盛京工部侍郎轉
哈甯阿爲禮部左侍郎○再撥京倉粟米六千石命順天府於四
路分廠平糶○丁未再撥京倉麥五千石粟米五千石於大興宛
平二縣平糶○丁巳予告理藩院尙書博興卒賞銀二百兩治喪
○戊午諭御史卿祖培奏武職都司以下各官請照文職一體欽
派大臣公同揀選一摺當奏上時朕卽以其言爲是批交大學士
軍機大臣會同兵部議奏茲托津等議覆應如所奏辦理向例文
職揀發各官佐雜微員尙奏請欽派大臣揀選武舉於會試後揀
選營衛亦由兵部奏派王大臣考驗何獨於武職都司守備轉由
兵部堂官自行揀選辦理原不畫一自應一體欽派大臣公同揀
選以昭公慎卿祖培此奏毫無私見甚屬可嘉言官陳奏事件總
當屏除私念如果出於至公實能有裨國事朕必鑒其悃誠降旨

嘉許立予施行若聽屬徇私亦不能曲從所請沾納諫之名誤國家之政也○以琦善爲江甯布政使敦良爲河南按察使

由太僕寺少卿

遷○王戊新修玉牒成○乙丑再撥京倉麥五千石粟米五千石於順天府四路接續平糶

六月丁卯朔諭伯麟奏剿平臨安江外逆匪拏獲逆首逆目按律辦理一摺此案逆首高老五係上年臨安江外滋事首夷高羅衣之堂姪因查拏逆黨逃赴藤條江外膽敢糾眾搶掠土司地方裹脅漸眾遂僭稱王號僞封官職抗拒官兵並偷渡江內窺伺臨安府城實屬罪大惡極伯麟派調官兵土練督率進剿連獲勝仗該逆匪等逃竄出江潛藏打雀山頂經伯麟所派東路官兵追探兜圍時逃西道何金密派兵練連夜鈔上山頂都司桂朝陽曹得周知州岳輝文冒雨領兵黎明齊至賊巢外委冉錫元首先搶入寨

門施放號礮兵練一齊奔入將高老五生擒並殲除餘逆辦理尙爲迅速伯麟著交部議敘冉錫元首先入寨手受刀傷殊覺奮勇著以千總卽行超補何金桂朝陽曹得周岳輝文著伯麟分別保奏候朕施恩其餘在事文武員弁擇其尤爲出力者保奏不可冒濫雙林帶領西路官兵踴期馳赴無勞足錄著卽赴古州鎮新任不必留於江外李慶雲張正揚失防蠻密渡以致賊匪渡江且李慶雲猝聞賊至輒關閉城門尤涉張皇姑念其戴罪自效尙知奮勉李慶雲著降爲遊擊張正揚著降爲把總俱留於滇省補用臨元鎮總兵員缺著該督卽於軍營出力人員內保奏請旨案內首逆高老五及得受僞封各賊目均已於軍前正法著名逆目馬居阿亦經續獲惟馬哈雜在逃見在提督張鳳業已渡江著卽督率兵練務將馬哈雜拏獲續經訊出逆犯一併按名擒捕審明治罪

不可稍留餘孽以儆夷氛而靖邊圉○戊辰以英惠爲內閣學士

由副都統遷

○己巳諭國家造就八旗人材以騎射爲根本其考試文

藝乃末技耳仰蒙 列聖施恩增此一途以廣登進之路卽缺此

一途亦於八旗人材無損定例旗人報考文場必先試以馬步射

方准入闈以示不忘本也承平日久舍勞就逸者多又因科甲人

員升遷較速遂各爭趨文事憚於騎射甚至考試文章竟有私減

年歲冀免馬射者大乖立法之意昨據哈迪爾景祿奏考驗八旗

文童馬步射內有年歲不符者三十八名當派軍機大臣查明具

奏茲據奏正藍旗覺羅邁拉松阿佛珠靈阿二名恭查 玉牒內

開載年歲實係私減捏報邁拉松阿佛珠靈阿不但此次扣除著

永遠不准考試文場其該管參佐領著交部議處考驗不實之都

統英和著交部察議至所奏各旗文童優興阿等二十八名覈對

該旗戶冊年歲均屬相符之處尙未覈實不足爲憑著交戶部檢齊各該旗報部戶口冊再行逐一確查據實具奏冊內空補年歲之內務府文童保勛常縣二名亦一併查明具奏其本無戶口冊之王公包衣希彥等六名著該王公自行查明據實具奏○壬申河南武陟縣沁河溢○壬午諭永瑋等奏懇添設內務府官學一摺東陵八旗官學設自乾隆年間遵行已久內務府官役子弟生齒日繁添設官學亦足以資教育加恩著照所請准其於景陵裕陵兩處內務府官圈之內各設官學一所卽於內務府人員內遴選滿漢通曉文義諳習騎射者派充教習每月給與薪水紙筆銀三兩在於永濟庫存貯項下動支報銷此外各圈居住之官役子弟令其就近歸學訓習該管大臣等隨時稽查分別勸懲以收實效○丁亥申禁州縣等官赴省干謁○戊子免雲南夷匪

滋擾及辦理兵差之建水等四十二廳州縣並貴州威甯州額賦
○壬辰諭本日朕恭閱 皇考高宗純皇帝實錄內載乾隆四年
正月兩江總督那蘇圖奏江蘇巡撫許容丁憂回籍緣由得 旨
朕一聞許容之奏卽命徐士林前往代伊而徐士林過於固執又
復具摺奏辭是使許容不及見父生面者非朕之過乃徐士林之
罪也將此旨寄彼令彼觀之欽此仰見我 皇考孝治天下於臣
下烏私矜恤備至因思張師誠前在江蘇巡撫任內以伊父患病
先經具摺懇請解任歸省朕已允其所請乃張師誠不候諭旨將
印信徑交楊馥護理自行回籍巡撫大員擅離職守不能不視職
示懲但念張師誠究屬愚孝伊本係翰林出身學問尙可張師誠
著加恩賞給編修服闋後來京供職再劉鳳誥從前恭纂 皇考
實錄曾有微勞學問亦可亦著加恩賞給編修來京○乙未諭據

理藩院奏駁原任巴林公賽尙阿之妻固山格格呈請進京與例不符等語定例凡在游牧居住之格格等如有呈請進京者十年後方准進京但此內格格等之父母若年近六旬十年後方准與格格等相見一次爲期太遠嗣後格格等之父母如有年逾六旬者著五年准其進京見在原任巴林公賽尙阿之妻固山格格未進京城已逾三年俟屆五年之期再行進京著爲令

東華續錄

嘉慶四十六

臣王先謙敬編

臣周倫蕃恭校

秋七月壬寅予告大學士劉權之卒子祭葬諡文恪○辛亥楊護緣事降三品京堂以程國仁爲浙江巡撫屠之申爲甘肅布政使方載豫爲甘肅按察使

由陝西陝安道遷

○癸丑諭成格奏土民籲留離

任知縣據情轉奏一摺直省牧令在官賢否其去留權操自上非士民所當干與若循良之吏聽土民籲請留任設有不職之員將不待上司之參劾亦聽土民驅之使去耶此風斷不可開况循吏課勞報最必將薦舉升遷彼時該士民亦不能卧轍攀轅強令不赴他任所有太谷縣士民呈請將前任知縣陳履和服闋仍留本任之處著不准行卽再三瀆請該撫亦不准復行具奏○己未吏

部奏外任旗員遇有事故回旗日久逗留卽應嚴議一摺得旨旗員補放外任遇有事故回旗原不准在外日久逗留是以定例較漢員加嚴但遲一月以上卽議降調半年以上卽議革職亦未免過重嗣後外任旗員丁憂回籍除正展限期外如起程遲延半年以上者著降一級調用一年以上者著革職○甲子 上啓鑾詣盛京謁 祖陵○免經過州縣額賦十分之五

八月丁卯朔諭連日經過道路多由民田開築時屆西成芟刈禾稼不免有傷農業嗣後凡驛路經臨處所務循照舊途修墊不得取道農田○甲戌免經過奉天承德等四州縣額賦○免經過奉天新民廳額賦○壬午 上詣 北鎮廟行禮○丙戌賚盛京宗室覺羅及移居宗室銀幣○戊子頒 皇朝通禮於直省○己丑閱盛京官員等射○河南沁河漫口合龍○庚寅閱吉林官員等

射○辛卯 上謁 永陵○壬辰行大饗禮○閱興京城○再閱吉林官員等射

九月丙申朔 上謁 福陵○臨奠宏毅公額亦都墓並加恩後

裔命散秩大臣公那蘇巴圖在乾清門行走加尙書和世泰太子

少保大理寺少卿成甯副都統銜起已革尙書福慶爲郎中○調

穆彰阿爲兵部右侍郎以文孚爲刑部右侍郎由副都統遷○調明興

阿爲盛京戶部侍郎以常起爲盛京工部侍郎由通政使遷○丁酉行

大饗禮 上謁 昭陵○臨奠武勳王揚古利墓○戊戌行大饗

禮 上至盛京詣 太廟尊藏 冊寶前行禮○遣官祭 壽康

太妃 懿靖太貴妃 康惠淑妃並公主園寢奠親王貝勒大臣

等墓○遣官祭 長白山 遼陽太子河 巨流河 渾河 北

海 松花江諸神 遼太祖陵○ 御製再舉東巡展謁 三陵

東唐書錄 卷一百一十五

大禮慶成記曰盛京爲大清肇基之始嗣服瞻依典至重也三
陵巍然在望水源木本紹統傳心莫獻展禋不可闕也洪惟
太祖高皇帝興京建業遼瀋開疆太宗文皇帝受璽承天
肇造區夏景錄熾昌豐功峻德備載於開國方略自唐虞以
來未有若斯之盛者也世祖章皇帝定鼎燕京撫綏中外聖
祖仁皇帝三謁珠邱致敬盡禮世宗憲皇帝在潛奉命往
謁祖陵是以未舉是典我皇考高宗純皇帝丙辰御極癸
亥展祀敬誦聖製盛京賦巍煥天文聿昭美備仰窺以祖
宗之心爲心居其要一言賅厥理傳奕禩子子孫孫欽承勿替大
清景運隆長寶繫於此也甲戌再莅遂至吉林望祀長白鉅典
彌隆孝思益展矣戊戌三詣留都九月丁亥上諭夫以朕
之景仰前型勤懇若是必三至乃得曉然於心凡我子子孫孫

紹登大統者可不體朕志以爲志。嗟懷遠瀋舊疆再三周歷。斬於
祖宗遺緒。身親而目覩哉。又諭云。我後世子孫。誠能遵朕此
旨。處尊位而常穉。前勞覽當年原轍而興思。拜舊里。松楸而
感愴。自當慷慨然於天眷之何以久。膺慷慨然於先澤之何以善。
繼知守成之難。兢兢業業。永保勿墜。則我大清果拾重熙之盛。洵
可縣延於億萬斯年矣。非然者。或輕故都而憚於遠涉。或偶詣
祖陵。視同延攬。古蹟而漠不動心。是則忘本而泯良。設有其人。卽
爲國家之不幸。實不願我後嗣之若此也。子若孫可不恪奉朕訓
而知儆懼乎。又諭云。或我子孫。尙知遵朕此旨。欲在陪京。而其
時無識之臣。工妄以爲人主當端處法。官綜理庶政。不宜輕出關
外。此卽我朝之亂。臣賊子當律以悖命之罪。誅之毋赦。煌煌聖
訓。敬守欽遵。曷敢少忽乎。癸卯歲八月。四巡盛京。自承德山莊。

取道柳條邊經由蒙古部落 特命子臣及二王隨扈奠獻 三

陵敬謹襄事長寧寺實勝寺拜瞻 衣冠弧矢清寧宮 神帳葛

鐙子臣等跪領 天語銘勅五中乙卯九月三日 宣諭立子臣

爲皇太子敬悉癸卯謁 祖陵時已將子臣之名 默告 列聖

子臣承此 隆恩實不忍少懈展謁 三陵之寸衷禮也亦情也

爰於嘉慶乙丑秋舉行謁 陵大禮悉遵 舊章作頌紀事至今

又十有二年矣祭不欲疏疏則怠怠則忘是以再舉東巡以伸積

慕攜皇次子 皇四子縣忻同來瞻禮庶幾印副我 皇考諄

諄垂訓以盛京爲根本重地後世不可不再三周歷之 聖旨感

天佑而欽 祖功承 先猷而啓後嗣予小子躬承 授璽親

聆 訓政兢業守成而致祭 三陵時巡舊國爲 傳心之大經

大法言念及此奚可不溯此典實不敢廢此典又何忍闕此典也

子若孫稍存偷安耽逸之心竟闕此典則爲大不孝非大清國之
福 天 祖必降災於其身百官士庶若妄言阻止則爲大不忠
非大清國之人必應遵 聖訓立置諸法斷不可恕況亂臣賊子
豈可容乎蓋盛京爲國家大本 三陵爲發祥始基躬親祀事稍
抒慤忱誠要務也彼昏愚無識習惰偷安之徒比擬遊觀又以勞
民藉口竟不知我朝舊制巡狩之典除道成梁皆出官帑令行禁
止絲毫不累百姓屬車所經由之處獨租賜復禁踏田禾夾路就
瞻歡騰鼓舞方遂其望幸之忱全無困苦之態此予屢隨 鑾輅
多年耳濡目染躬親閱歷者也敬誦 聖製南巡記云今歲甲辰
攜諸皇子以來俾視予躬之如何無欲扈蹕諸臣及僕役之如何
守法地方大吏之如何奉公民人之如何瞻覲親近有不如此未
可言南巡我 皇考垂訓盛京不可不去南巡必宜遲卽不去亦

可禮典重輕大相懸殊豈可相提並論景仰 前猷懷承 庭訓
盡此誠敬之微忱分別重輕之典故此心日久自明矣伏讀 聖
製盛京賦融會渙洽於深衷奚能述作於楮墨哉恭依 頌言敬
和 元韻稍抒寸誠昭哉嗣服毋忘 先烈期永保我大清萬年
景命遂予之深願續成頌曰戊寅秋仲敬詣瀋陽越十三載再舉
省方深感 帝佑普錫豐穰舊都建極鞏固金墉八門四塔興義
蘊藏殿閣正寢製備九重 開勅鴻業奕葉繁昌我 考四巡
訓言疊沛本本水源 心傳意會盛典昭明 湛恩汪濊夏清冬
溫 訓政是賴莠淨良安靖內綏外致治保邦席豐履泰尋繹
恩綸曷敢怠懈 天作皇清開基拓土五部政修八旗勁旅作邑
設管爰居爰處虔謁 祖陵聿瞻庭宇宴資聖澤幣領耆老賜復
蠲租博及比戶感荷 考恩迥超往古才疏德薄兢業承基引長

勿替宵旰榮恩秋霜春露懷愴瞻依鳴鑾遵路禾茂時和修祀展
禮備薦上儀名王扈衛及高句麗心孚情洽班聯久隨執事侑
神清盥閣寢長發其祥式廓遼瀋東壁霞翻懸留庭枕曉旭曛
雲霞淦淦萬福之原陳道祭品 敷訓眇躬跪聆接在銘勅五中
聖謨虔稟永念率由 臨下有赫衍慶凝祥喬皇烏奕基自

天開 福由仁積仔肩守成御厥推赤故國再巡宮門重闕敬紹

考言長欽 祖德聚我宗盟畋田宅宅崇政朝會十亭布筵禮
歲典備六御和鸞記以述志載賡 頌言 聖孝首諭告我君臣

欽哉無怠惕若藐躬存誠永慕心堅志愔繩 武受 祐統緒長

縣○子移駐盛京宗室每戶歲增倉米二十二石○己亥釋發遣

盛京吉林黑龍江情輕各官犯○子扈從王公大臣蒙古王貝勒

等加級紀錄有差○釋發遣盛京等處宗室覺羅情輕各犯回京

分別免罪錄用○免盛京戶部各莊頭額糧○再免奉天所屬府
廳州縣明年額賦○庚子 上詣 天壇 堂子行禮○ 御崇
政殿受賀○詣 文廟瞻禮○臨奠克勤郡王岳託墓○朝鮮國
王李琺遣陪臣至盛京表貢方物賜 御製詩章 御書福字○
減奉天吉林等處各犯罪軍流以下免○辛丑 上御大政殿賜
扈從王公大臣蒙古王貝勒貝子公及盛京文武官員朝鮮使臣
等宴○免盛京興京等旗地額賦十分之三並上年逋賦○免奉
天內務府莊頭逋賦○壬寅 上詣 地壇行禮○臨奠直義公
費英東墓並加恩後裔以乾清門侍衛盛貴爲散秩大臣○癸卯
廣奉天等府各屬歲試學額○免盛京官員借支俸餉銀○乙巳
賞扈從兵丁等一月錢糧○辛亥 上回鑾○壬子再免奉天承
德縣新民廳二十五年額賦十分之五○乙卯諭盛京陵寢宮殿

以及綠垣桂板各項工程前於十年有旨令盛京將軍會同盛京工部隨時修整並著軍機大臣每閱二年提奏請 簡派宗室王貝勒貝子公暨大學士六部尙書等數人前赴盛京查看一次又向例五年派京卿一員巡查奉天由盛京五部侍郎內奏派二員巡查吉林黑龍江因思派員巡閱原以慎重官守稽查懈怠然定立年限則期可豫知卽有弊端不難先期掩飾於事仍無裨益嗣後該三省屆期閱看巡查之例俱著停止奏派朕酌量應行查閱之時特旨派員前往以昭覈實○丁巳怡親王奕勳薨遣熱河都統松甯往奠茶酒賞銀二千兩治喪派散秩大臣宗室奕禮照料喪務回京子祭葬諡曰恪○庚申召巴哈布來京以吳邦廣爲湖南巡撫調琦善爲河南布政使以恆敏爲江甯布政使特通阿爲陝西按察使由河南南汝光道遷○辛酉定特派大學士等覆覈朝審人犯

情實緩決例

冬十月庚午 上以萬壽節御興隆寺行宮賜扈從王公大臣等

食賞賚有差○賚迎鑾老民銀幣○辛未 上御興隆寺行宮受

賀禮成賜名萬壽興隆寺○賞辦差兵丁半月錢糧免經過州縣

額賦十分之二○癸酉 上謁 昭西陵 孝陵 孝東陵 景

陵 裕陵○乙亥定守護 三陵總管五年更換例○丙子 上

還京師○丁丑予告太保大學士董誥卒晉贈太傅入祀賢良祠

遣定親王縣恩帶領侍衛十員往奠茶酒賞銀二千兩治喪予祭

葬諡文恭賞其子溍四品京堂○辛巳 上臨故大學士董誥第

賜奠○乙酉葉紹桂以與布政使富綸互參解任以趙愷畛爲廣

西巡撫魏元煜爲廣東布政使左輔爲浙江按察使由廣東言○

以張志緒爲廣西按察使由陝西陝安道遷○解富綸任以繼昌署廣西

布政使

由大理寺卿署

○丙戌轉普恭爲吏部左侍郎以成甯爲吏部右

侍郎

由副都統遷

○吏部左侍郎熙昌卒於湖南差次贈都統銜賞銀

五百兩治喪予祭葬諡敬慎○戊子調穆彰阿爲工部左侍郎德

文爲兵部右侍郎

十一月辛丑調成甯爲倉場侍郎德文爲吏部右侍郎以英惠爲

兵部右侍郎

由副都統遷

○戊申諭

天壇望鐙杆木丈尺雍正年間

定例原係九丈刷於乾隆年間四川總督阿爾泰辦到杆木較長

始奏准通高十丈四尺較原立杆木增長一丈四尺見在杆木因

年久閒有蟲蛀處所自應敬謹更換杆木舊有定制若照增長丈

尺恐一時採辦維艱著四川總督湖南巡撫仍查照雍正年間定

例委員採辦長九丈大徑二尺七寸小徑一尺二寸杆木正副六

根外箴木十八根卽行運京以備更換○丁巳諭額駙揚古利乃

開國勳臣故其世世子孫之中均賞一領侍衛內大臣福克津承襲公舒經朕加恩賞給散秩大臣年來察看福克津人尙醇樸當差亦勤著加恩將縣志所出正白旗領侍衛內大臣員缺卽著福克津補授以示朕眷念勳舊後嗣至意○增建江南睢南廳屬峰山開減水石壩

十二月甲子朔免雲南銅廠通銀○戊辰 上詣 大高殿祈雪

○乙亥諭朕丙辰元旦仰蒙 皇考高宗純皇帝大廷 授璽寶紹 丕基兢兢業業以勤求邳治所願者四海羣黎同臻康樂敬惟 皇考臨御六十年普免天下錢糧四次漕糧三次 湛恩汪濊淪浹民心朕嗣位以來亦思廣施闡惠大資寰區始緣教匪不靖軍興孔棘繼以黃河泛溢屢舉大工十餘年閒所費帑金數踰十千萬國家財賦殷有常經實有入不敷出之勢是以朕五旬正

慶雖恩綸載錫而未能普惠閭閻比年仰荷 昊蒼垂佑稂莠蕩
除萬方甯謐河流順軌久慶安瀾以正供所入謹制國用尙可無
虞匱乏朕子惠元元深念損上益下之義俟將來府藏充盈仍欲
覃敷渥澤明歲爲朕六旬正壽宜先蠲除積逋俾小民戶免追呼
共享含哺之樂所有各省節年正耗民欠及因災緩徵帶徵銀穀
著各督撫詳細查明速奏以次豁免先將此旨宣示城鄉村鎮咸
使聞知俾官吏胥役無從影射侵欺以期膏澤下究用副朕惠鮮
懷保仁壽斯民至意○丙子 上再詣 大高殿祈雪○癸未增
甘肅鎮西迪化二府州鄉試中額一名○丁亥諭和舜武奏審結
積案起數一摺山東巡撫衙門積案一千三百七十四起自和舜
武到任後先後審結一千一百二十起臬司衙門積案六千八十
餘起溫承惠到任後審結五千四百起該省前此盜風甚熾見在

匪徒斂戢行旅安然和舜武溫承惠辦事認真著有成效俱著加恩交部議敘前任山東巡撫陳預臬司張五緯因循廢弛實難辭咎陳預著降補刑部主事非奉特旨不准保升張五緯見發往軍臺效力期滿之日不准卽行奏請釋回候旨辦理以示懲儆○戊子諭本日領侍衛內大臣總詣達內務府大臣等奏派明年二月初七日祭 孝淑皇后陵寢隨從二阿哥之散秩大臣詣達內務府大臣此奏未免過早朕經召見那彥寶詢問據奏向於正月內奏派因明年恭值六旬大慶是以改於歲前忌辰具奏此言甚屬非是明年一歲之中如清明中元冬至俱有祭 陵典禮豈能槩行避忌具奏卽明年正月內逢忌辰者共有四日彼時奏派並不爲遲亦何必早至月餘耶從來人君好言吉祥動輒避忌最非美德明歲值朕周甲之年率土膺歡然中外應行陳奏事件豈必盡

皆美善若似此拘泥那前移後必致事多積壓其有關於政治者
非細茲特明白宣示內外大臣明歲凡有應奏事件俱各照常陳
奏或值綵服日期斟酌呈遞亦屬臣下忠敬之忱萬不可專意粉
飾致妨實政轉非所以仰體朕夙夜孜孜勵精圖治之心也將此
通諭知之○庚寅諭昨據給事中李振祐參奏都察院此次京察
有給事中色成額一員先經列入六法嗣該給事中獨赴公堂辨
論干求演習拜跪該堂札行吏科改列三等前後反覆視若兒戲
等語當交軍機大臣查明具奏茲據奏調查該衙門冊札等件並
詢之色成額及該院經歷等官原冊內色成額先填有疾復經都
察院札知吏科改入三等屬實至色成額上堂銷假會演習起跪
廳官百昌陶定中親見實未求改三等該給事中下堂後各堂公
商札行吏科改入三等請將都察院堂官分別嚴議議處京察爲

激揚大典舉劾皆當慎重況都察院職司風憲尤不應稍涉游移
此案都察院堂官所定京察冊籍雖未過部但業經公同註考乃
輒將六法之員札行吏科改列供職實屬輕率色成額仍著列入
有疾是日在署公同議改之都察院堂官景祿吳芳培蔣祥墀齊
布森俱著交部嚴加議處和桂隨同畫諾著交部議處尋議上得
旨景祿等俱著實降一級調用景祿以副都統候補吳芳培以侍
郎候補齊布森蔣祥墀以從三品京堂候補和桂降二級留任不
准抵銷○以穆克登額劉鏞之俱爲左都御史○以松筠爲禮部
尙書○是歲朝鮮琉球來貢○會計天下民穀數各省通共大小
男婦三萬四千八百八十二萬二十七名口各省通共存倉米穀
三千五百五十六萬三千一百四十四石八升七合七勺

東華續錄

嘉慶四十七

臣王先謙敬編

臣周倫恭校

嘉慶二十四年己卯春正月甲午朔 上以 六旬萬壽頒詔天

下覃恩有差○封 皇三子縣愷爲惇郡王 皇四子縣忻爲瑞

親王 皇長孫奕緯爲貝勒○晉封貝勒縣志縣懃郡王銜賞三

眼花翎貝子奕紹爲貝勒鎮國公縣偲輔國公縣懋爲貝子晉封

科爾沁貝勒鄂勒哲依圖郡王銜賞三眼花翎予托津雙眼花翎

加章煦太子太保○戊戌以常起爲吏部右侍郎明敘爲盛京工

部侍郎俱由內閣○以善慶韓鼎晉俱爲左副都御史善慶由通政使韓鼎

晉由大理寺卿遷○癸丑諭御史唐鑑奏請復輪班日講官員及繕進經

史講義一摺經書史鑑皆闕治道人君日理萬幾不廢典學我朝

列聖相承皆本 聖學以成 聖治朕仰紹 詒謀孜孜求治

每值幾暇亦惟披覽經史學於古訓然念帝王之學在於貫徹天人明體達用以見諸施行與經生尋章索句者不同從前康熙年間 聖祖仁皇帝曾有翰林輪班入直之 命旋即停罷乾隆初

年 高宗純皇帝命翰林科道輪進經史講義其後卽有借進講經書諷時事行其詐僞者特行降旨訓飭至乾隆十四年因御史金相之奏 聖諭以諸臣按日奏御所稱洞達天人發明道奧者殊不槩見行之十餘載漸成故套 敕令停止自後數十年總未舉行是以朕嗣位以來亦未議及此事今該御史請復此舉朕每日召見臣工多至十餘起披覽章奏動輒數十件卽使添見翰林四人多閱講義數篇亦斷不以爲煩苦惟朕召見大臣皆以諮諏庶政卽京堂各官近年增有冬季輪班值日之例其學識之淺

深心術之邪正於召見時亦均可鑒察至翰林院資格本淺俟升轉至學士以上或擢用京堂改補科道自可敷奏以言如此時遽令擢進講義輪班入對其能聞聖賢之精義陳古今之治忽者能有幾人若徒摭拾陳言敷衍入奏或以頌揚塞責甚至妄議時事豈非徒亂人意乎朕圖治雅殷然一切皆求之於實所謂爲政不在多言願力行何如耳使但博稽古之名而無裨實政殊不如其已也該御史所奏著無庸議○丁巳諭三載考績爲國家激揚大典朕於諸臣中察其奉公恪勤尤爲出力者方給予甄敘其有年老而精神尙不至衰頹者仍可留任供職本年京察屆期吏部將京外各大員開單具奏朕詳加覈定大學士托津在軍機處夙夜宣勤大學士章煦管理刑部事務尙屬盡心協辦大學士吏部尙書戴均元辦事妥協人亦敢言吏部尙書英和辦事認真竊獲匪

犯多名戶部尙書盧蔭溥承旨書諭夙夜愼勤俱著加恩交部議敘協辦大學士雲貴總督伯麟兩次辦理軍務均能迅速蒞事山東巡撫和舜武整頓地方清釐積案日有起色俱著加恩交部議敘餘俱著照舊供職○調崇祿爲兵部尙書和甯爲刑部尙書○罷和甯軍機處行走命刑部右侍郎文孚在軍機大臣學習行走○戊午增設山西歸化城屬大青山外蒙古扎薩克地方卡倫並派弁兵巡緝

二月甲子 上御經筵○允廷臣請編 御製詩三集○辛未左

都御史兼管太常寺穆克登額以少卿善祿管儀錯誤降工部右

侍郎以誠安爲左都御史由工部右侍郎遷○乙亥以四川無進賦免明

年額賦十分之二○免江蘇浙江各鹽場進課○以色克精額爲

內閣學士由太常寺卿遷○辛巳命嗣後鄉會試停止考官上馬宴其金

花表裏杯莖等件卽於午門前宣賜○增建山東南旺湖閘○壬辰以貴州無通賦免明年正賦十分之二

三月甲午諭昨降旨將鄉會試點派考官密本屆期派乾清門侍衛齋至午門前拆封宣旨著自本科會試爲始禮部於三月初四日將題本送閣初五日進呈初六日發下卽交捧本侍衛齋往至鄉試遇朕巡幸之年著該部豫行計算發報日期扣至八月初六日黎明到閣卽早亦必於初五日到閣初六日黎明齋至午門前照新定規制拆封宣讀考官等卽刻入闈不准在內閣先行拆封著爲令○丙申定各省咨報各缺限期○己亥 上親耕耤田是日 上啓鑾謁 東陵 西陵○免經過地方額賦十分之三○

辛丑刑部右侍郎彭希濂以耕耤失儀降調○壬寅 上謁 昭

西陵 孝陵 孝東陵 景陵 裕陵○癸卯清明節 上謁

東華續錄 嘉慶四十七 三

裕陵再行敷土禮○免山東銅版通銀○丙午山東巡撫和舜武

卒贈總督銜○調程國仁爲山東巡撫陳若霖爲浙江巡撫以琦

善爲河南巡撫廉奇瑜爲河南布政使彭希濂爲福建按察使

刑部右侍郎

○戊申諭軍機大臣等玉麟等奏藏中僧俗人等求定達

賴喇嘛呼畢勒罕一摺甚屬非是從前各處呈報呼畢勒罕出世
每多附會爭端漸起弊竇叢生 皇考高宗純皇帝洞燭其情設

金奔巴瓶藏名掣定之制 睿謀深遠自當萬世遵行今裏塘所

報幼孩其所述靈異何足徵信若遽聽其言與從前指定一人者

何異玉麟等不嚴行駁飭實爲錯誤著傳旨申飭此次裏塘幼孩

卽作爲入瓶籤掣之一俟續有報者再得其二方可將三人名

一同緘封入瓶照定制對眾誦經掣籤著將此旨明白傳諭第穆

呼圖克圖毋許再瀆若來京求請卽查拏治罪○丁巳 上幸南

苑行劄○以山西豐鎮廳屬入官地畝爲大同鎮六營牧廠○己未 上謁 泰陵 泰東陵至 孝淑皇后陵奠酒回鑾

夏四月甲子 上還京師○癸酉朱理卒以韓克均爲貴州巡撫

嵩孚爲安徽布政使鄒翰爲安徽按察使由福建汀州龍道遷○丁丑諭考

試試差人員自此次爲始四書題文二篇內著減去一篇添五經

題文一篇仍用五言八韻排律詩一首著爲令○以山西解州二

十五廳州縣上年歉收撥倉穀平糶○庚辰 上閱健銳營兵○

癸未諭明刑所以弼教婦女首重名節舊例婦女和姦悔過拒絕

復被倡姦將姦夫殺死者均照擅殺罪人律減一等擬以杖流其

未經和姦因拒姦擅殺罪人之婦女轉科以殺候於情法本未平

允此案李何氏因拒姦殺死周得侂刑部照較候擬覆大理寺於

會議時鐵商議減所議甚是刑部堂官亦卽詳酌奏改條例所辦

亦是著依議纂入例冊其李何氏一案卽照新例辦理至大理寺堂官係何人首先倡議籤商著據實奏明議敘不得以公同看出含混具奏○丙戌賜陳沆等二百二十四人進士及第出身有差○戊子罷安徽鳳陽關江西九江關監督以道員管理○己丑上詣 黑龍潭祈雨○方體因病乞休以陳廷桂爲湖北按察使由安襄鄖荆道遷

閏四月壬辰朔諭孫玉庭參奏李奕疇濫派漕委多人滋累幫丁州縣一摺漕委一項前經鐵保等奏明節次刪減迨李奕疇任內逐漸加增派委至一百四十餘人之多該漕督曾向孫玉庭言及漕標候補人多窮苦堪憐不得不舉行差委以資調劑李奕疇多派漕委並以調劑爲詞是明使該漕委等需索旗丁以致大幫每幫出銀三百兩小幫每幫出銀二百餘兩旗丁費何由出悉皆取

之州縣州縣費何由出悉皆取之糧戶浮收之弊日甚一日漕委
之擾累實啓其端該漕督辦理不善咎無可辭李奕鳴著交部嚴
加議處尋降
郎中○以李鴻賓為漕運總督調康紹鏞為廣東巡撫以

姚祖同為安徽巡撫調祝慶承為直隸布政使以王輅為雲南布
政使劉寶第為廣東按察使由直隸天
津道遷○癸巳德麟以誤班削爵

命其子慶敏仍襲貝子○甲午調廉敬為廣東按察使劉寶第為
雲南按察使○乙未修山東運河西岸隄工○戊戌諭本年庶吉

士散館考列三等者俱歸原班銓選內強望泰一員係強克捷之
子趙榮一員係趙文哲之孫強克捷前於滑縣殉難趙文哲前於
水果水軍務陣亡均係歿於王事朕優恤忠良後嗣特加恩將強
望泰趙榮俱用為內閣中書俾得仍列清班該二員其各勤慎供
職勉勵進階○庚子廣慶緣事解任以岳齡安為山東布政使祥

泰爲直隸按察使

由湖北安襄歸州道遷

○己酉

上詣

天神壇祈雨○

是日雨○

庚戌吳璥因病解任以韓封爲刑部尙書調王鼎爲刑

部右侍郎轉周系英爲吏部左侍郎以吳芳培爲吏部右侍郎

部左侍郎

○壬子復雨○乙卯訥福以病解任以海齡爲湖北布政使

嚴士鉉爲湖南按察使

由四川東道遷

○丙辰免河南睢工衡工攤徵

通銀○

調敦良爲湖南按察使嚴士鉉爲河南按察使○己未定

繙繹鄉會試覆試例○

庚申諭軍機大臣等賽冲阿奏宗室喜福

同伊子敦柱先後與李康氏通姦主使李康氏將嫡妻塔他拉氏

毆傷勒斃一案蔑倫傷化玷辱宗盟覽奏實堪痛恨喜福敦柱俱

著革去頂帶交賽冲阿等嚴加審訊務令供吐實情此案喜福身

係宗室父子聚麀無恥已極其妻塔他拉氏勸以正言乃逞忿毆

傷至一百二十餘處之多慘毒異常復主使李康氏將妻勒斃似

此淫惡之徒卽應問擬絞決至敦柱先與李康氏通姦迨李康氏向其告知伊父令將伊母勒死乃並無一言阻止轉以隨爾們鬧去之言回答並幫同移屍裝棺卽與同謀斃母命無異按律罪應凌遲惟宗室向無凌遲之例著賽冲阿率同棚武布慶傑傳集移居各宗室並喜福一同看視先將敦柱重責一百板打至血肉潰爛再將喜福敦柱一同絞決李康氏下手勒斃塔他拉氏以邪淫陷害三命著卽行斬決審明後賽冲阿等卽奏明分別辦理至棚武布慶傑本有失察之咎念伊二人管理未久著免其議處嗣後當認真稽查隨時管束務令諸宗室各知戒懼免蹈刑章

五月戊辰調李堯棟爲福建巡撫史致光爲雲南巡撫○辛未禁旗人抱養民人及戶下人爲嗣○以誠安爲熱河都統普恭爲左都御史成甯爲吏部左侍郎那彥成爲倉場侍郎

由舊事遷

○己卯諭

朕恭閱 皇考高宗純皇帝實錄內載乾隆十二年十二月大學士等議覆梅穀成所奏將正一真人改爲正五品秩缺出由該無咨部襲補照道官例註冊朝覲筵宴均如所奏停止奉旨允行正一真人係屬方外原不得與朝臣同列嗣後仍照舊例一應朝覲筵宴槩行停止○諭近來宗室中屢有不顧行檢干犯法紀之人疊經訓誡總未悛改推原其故皆因宗室犯事到官向不跪訊遂有所恃而不知畏憚伊等旣如此不知自重朕挽除積習亦不能再援議親之典嗣後宗室犯事到案無論承審者何官俱先將該宗室摘去頂帶與平民一體長跪聽審俟結案時如實係無干仍奏明給還頂帶似此稍示裁抑庶共知戒懼可冀犯法者日少也○乙酉諭本月二十四日恭修 地壇 皇祇室內 高宗純皇帝神牌托座行告祭禮據監禮御史永明額等參奏終獻時恭詣

列聖神位前獻爵贊引次序錯誤成親王及太常寺堂官俱各自請治罪告祭典禮重大理應敬謹將事乃於昭穆先後次序有紊其咎甚重成親王自乾隆年間觀禮壇廟數十年來屢充分獻陪祭差使一應禮儀久經熟諳於心縱使贊引錯誤自當即時指正乃率依導引行禮舛誤按其咎辜本應革去王爵交宗人府治罪但念此次初獻亞獻俱未錯誤至終獻先西後東歷獻

配位四案經松筠向前阻止成親王尚不自覺爲開始悟係因年衰體弱起跪更番步履遲鈍以致精神昏憒尙爲可原且朕與成親王自幼最蒙皇考鍾愛同受厚恩況友于心切此時實不忍遽褫其爵實朕姑息之處成親王既獲重愆而且年老多病難以管理事務所有各項差使著全行革退不必在內廷行走或在城在園均於邸第閉門思過亦無庸隨班上朝仍罰親王半俸十

年照郡王食俸至十年後方准開復其子孫懃革去內大臣隨班上朝在家侍父太常寺堂官於告祭大典派禮儀生疏之員承充贊引殊屬疏懈著交部嚴加議處贊禮郎清安泰卽革職鎖罕交刑部治罪○戊子諭清安泰於告祭大典贊引錯誤部議照大不敬律擬以斬決實屬罪所應得姑念其補授贊禮郎未久儀節生疏一時昏迷舛錯著改爲斬監候入於朝審情實辦理

六月癸巳海齡以親老乞改京職命以三品京堂候補以承光爲

湖北布政使童槐爲江西按察使

由山東充沂青道遷

○癸卯調松筠爲

兵部尙書崇祿爲禮部尙書○調恩甯爲吏部左侍郎以和桂爲

禮部左侍郎

由左副都御史遷

○丁未諭伯麟等奏南掌國自內附以來

乾隆五十九年曾經頒給敕印嗣因該國王召溫猛懷懦不振流徙越南經越南國王將敕印恭繳念其流離不加聲責該國

事聽其以召蛇榮代辦見據召蛇榮之子召蟒塔度腊庚修職貢
顯懇再頒 敕印著加恩俯允所請再行頒給以示懷柔○戊申
諭軍機大臣等本日召見周系英據奏湖南湘潭縣城外向來江
西客民在彼貿易者十居七八本地居民不過十之二三各馬頭
挑夫江西人尤多平日恃眾強橫最喜滋事此次與本地居民互
毆原因聽戲而起江西商民將本地民人闖入公所廟內毆斃無
數浮屍蔽江當時知縣會營前往查拏比至公所廟門關閉不放
再三叫門僅將知縣營官放進知縣見有許多人被困並有將手
掌釘在牆壁者再四開導始交帶回知縣將帶回之人悉行釋放
各馬頭挑夫聚集多人欲行肆鬧巡撫聞知始派臬司會同副將
帶兵前往彈壓等語此案前據吳邦慶所奏爭鬪情形本未明晰
見據周系英面奏該商民爭鬪及毆斃人數與該撫前奏情節不

符著吳邦慶卽行身臨其境不可畏難將糾開實在情形並毆斃
人數確切查明如果情勢兇橫將首先聚眾肆橫之人逐一查拏
從嚴懲辦首犯卽行正法斷不可存化大爲小之見姑息了事益
釀刀風○己酉改雲南開化府同知爲安平同知潞江府司獄爲
安平同知司獄裁麗江府經歷增設文山縣分防縣丞○壬子調
李堯棟爲湖南巡撫吳邦慶爲福建巡撫○丙辰裁廣東潮州府
稅課大使增設豐順縣留隍司巡檢○丁巳以齡椿爲左副都御

史

出大理
寺卿遷

東華續錄

嘉慶四十八

王先謙敬編

周嗣蕃恭校

秋七月壬戌諭朝廷設官分職各有職守分內之事尙且自顧不暇何必旁求他務大廷日行政事自有內閣傳宣布告天下原不秘密必欲先知差人偵探其心不可問矣至於日日召見內外大小臣工乃我朝之善政良法永遠奉行切勿怠忽若前明專任中涓宰相皆不識面淪胥以亡可不戒乎孰意近來惡習竟將按日召見人名先後次序各處報知以爲趨奉鑽營之本其心益不可問有職守者藉口探聽本任差務而別衙門之事皆推卸於附稟事後遁辭其誰欺乎尤可異者毫無職任閒散王公日日差人偵探政事分旗結伴又假手吏胥非但心不可問而且形迹可疑此

內布蘭泰殘廢在家亦差人偵探實屬奇怪至極之事若再不力加整頓必致政出多門壞法亂紀朝綱委靡不能救藥揣摩迎合狗苟蠅營成何政體乎朕兄儀親王年已七十有四精力漸衰所管之處甚多恐有貽誤是以差人探聽況素常並非喜於探聽事務朕自知之總因年長之故其情可原朕不忍煩勞長兄有失頤養止留內廷行走以昭恩眷平日不必入直惟典禮朝賀筵宴迎送等事再進來行走所有各項職任全行開缺另派人管理成親王前已獲咎此次同儀親王俱著寬免以示友于議親至意其餘所有有職任之肅親王永錫等各折罰王貝勒公俸六年不兼職任之禮親王麟趾等各折罰王貝勒貝子公俸十二年載銓等依議所有各家聽事人等本應全行斥革此次姑從寬免自今日始王公大臣再有探聽召見起數及任外公事者本人革職探聽之

人發往伊犁朕言不再各宜懷遵特諭○甲子諭國家神武開基
清語騎射乃滿洲舊俗根本重務必當萬年無忘是以巡幸盛京
最爲鉅典我 皇考高宗純皇帝曾因 親詣盛京 垂諭後嗣
當瞻懷遼瀋舊疆再三周歷或無識臣工妄以爲不宜當律以悖
命之罪誅之無赦其次卽木蘭秋獮肄武習勞亦必當恪遵 成
憲永守勿怠 皇考聖製避暑山莊後序追述 聖祖仁皇帝始
建山莊所以詰戎綏遐崇樸愛物之義 世宗憲皇帝聖訓後世
子孫習武木蘭無忘 家法並 申諭以敬告後人若後人而忘
予此言則與國休戚相關之大臣以及骨鯁忠直之言官執予此
言以諫之可也煌煌 聖訓昭垂奕禩上年朕東巡祇謁 三陵
松筠因畿輔小旱上章阻止此奏若出於他人朕必律以悖命之
罪卽予正法因松筠身爲首輔且素有忠悃中外之人皆可諒其

無他故止以降謫示懲曲從寬典木蘭秋獨 皇考慮及後嗣之

不能式循尙有望於忠諫設有從而阻止者亦不可不嚴示罰懲

茲特明降諭旨嗣後每歲舉行獨典或偶值天時水旱朕心自有

權衡如此次降旨啓鑾屆期適遇大雨橋座被衝卽降旨改期並

非因人奏請儻有無識之徒敢於朕前建言阻止者必將其人立

予革職發往伊犁以爲阻撓大典委靡不振者戒朕言不再懷之

勿忽○庚午以雨詔停秋獮仍詣避暑山莊○甲戌以德奎爲河

南按察使由甘肅鞏○庚辰 上啓鑾詣避暑山莊○英惠以管

道嫺情降三等侍衛調常英爲兵部右侍郎轉博啓圖爲理藩院

左侍郎以裕恩爲理藩院右侍郎由內閣學士調○免經過地方額賦由

京至古北口十分之四由古北口至熱河十分之五○壬午直隸

永定河溢命吳璥那彥寶馳往堵築○癸未諭前因傅瑞祥一案

誤鈔諭旨兇出該王公等各派有護衛探聽公事當降硃諭將該王公等分別罰懲嗣於召見廷臣時詢及俱奏稱各王公等派人聽事相沿已久並非始自近年其最後襲職之王公貝勒貝子等多係年幼之人該護衛沿習探聽向其稟知伊等並不解係不應爲之事且前此各護衛姓名俱由薩敏供出其薩敏有未經指實者或知而不言者或竟不認識者該王公等俱俸免罰懲亦未爲平允所有原折罰俸十二年之禮親王麟趾等著加恩改罰王貝勒貝子公半俸六年原折罰俸六年之肅親王永錫等著加恩改罰王貝勒貝子公半俸三年儀親王成親王於此事前已加恩寬免罰懲慶郡王永璘原折罰郡王俸六年著加恩寬免四年改罰半俸二年○乙酉撥廣儲司銀一萬兩撫恤南苑被水災民○丁亥免直隸灤平縣被水地方額賦十分之五○己丑撥廣儲司庫

銀三千兩撫恤灤平縣被水災民

八月辛卯 上駐蹕避暑山莊○河南蘭陽儀封北岸河溢奪葉

觀潮職命吳璥馳往會同琦善堵築○壬辰以善慶爲工部右侍

郎由左副都御史遷○癸巳以李鴻賓爲河東河道總督成甯爲漕運總

督由都統遷○乙未命順天府於大典宛平二縣設廠平糶並簡京卿

監放○丁酉命順天府於固安永清東安霸州四州縣設廠煮賑

○戊戌命李鴻賓赴河南督辦漫口工程程國仁兼辦山東通河

事○壬寅予告大學士威勤伯勒保卒晉贈一等侯遣 皇四子

瑞親王縣忻帶領侍衛十員往奠茶酒予祭葬諡文襄○撥北倉

米十萬石於直隸備賑○戊申諭軍機大臣等本日成甯奏接受

漕督印務一摺成甯曾任巡撫於外任事尙爲熟諳但伊前在山

西巡撫任內卽好爲華侈致屬員加意供應因此降黜嗣棄瑕錄

用昨以漕運總督一時簡用乏人將成督補授並賞用頭品頂帶
成甯當倍加感激勤慎辦公於操守一事尤應力自檢束見在漕
務正當剔除積弊大加整頓之時伊年逾七十所謂及其老也戒
之在得不可因係頭品頂帶妄自尊大又復好尚華靡再蹈前轍
儻有簠簋不飭之事經朕聞知惟有執法嚴懲不能以其年居桑
榆稍從寬貸也○己酉河南黃沁廳屬武陟汛河盜命葉觀潮搶
紮贖罪○改河南商城汛守備隸光州營○癸丑命嗣後盛京戶
部官莊六品官缺出 三陵衙門碑帖式准一體揀選○乙卯
上自避暑山莊回鑾○諭程國仁奏參臬司溫承惠日益橫恣事
多窒礙一摺溫承惠在山東臬司任內自以曾任督撫大員不肯
甘居人下威福自擅設立發審專局調派見任州縣久住省城造
言生事樹立黨援又令犯罪之人四出緝捕所至嚇詐頗滋物議

種種恣意妄爲以致巡撫諸事棘手本月黃河北岸隄工漫溢曹縣適當頂衝程國仁正值入閘以溫承惠曾辦河工委令前往查辦溫承惠答以此係藩司之事若委伊往辦卽刻告病其情形尤爲跋扈溫承惠前任直隸總督身罹重罪經朕棄瑕錄用由郎中外擢臬司一聞黃河漫口不待巡撫差委卽當自請前往勉圖自效稍贖前愆乃負氣推諉卽此一事斷難輕恕且其年已衰老卽罷斥亦無足惜溫承惠著卽革職飭令回籍並不准來京逗留○調董槐爲山東按察使以孫爾準爲江西按察使由福建盛道遷○戊午上至古北口閱兵

九月壬戌 上還京師○諭吳邦慶奏審訊江西商民與湘潭土民互毆一案正在查辦聞七月二十七日接到侍郎周系英書信一函不敢壅於上聞等語此案見飭秉公審辦周系英何以率行

致書本省巡撫著卽明白回奏○癸亥諭據周系英奏稱因六月間見此案原奏與伊鄉人傳述情形迥異是以致書告知實屬冒昧自請議處等語直省地方事務經朕飭交該督撫查辦是非曲直一秉大公斷不任其稍有枉縱若在京大員於本省案件輒致書督撫私欲庇其鄉閭豈不漸同明代黨援陋習此風斷不可長周系英私致信函把持公務著交都察院嚴加議處○丙寅諭都察院議處周系英以本省案件致書巡撫請照因事屬託例革職所擬甚是江西客民與湘潭土民互毆一案周系英屢次在朕前面奏當降旨令吳邦慶秉公查辦並恐所奏情形尙有不盡會令軍機大臣向伊詳悉詢問據其所言飭交本省據實嚴查周系英如謂吳邦慶初次奏到之摺與伊所聞情節不符不妨具摺再行陳奏案關地方公務非伊一家私事朕亦不加深責乃輒向本省

巡撫私致書兩實屬糊塗之至本應照例卽行罷斥姑念其素日

人尚樸實學問亦好周系英著革去侍郎加恩以編修用○調顧

德慶爲吏部左侍郎以王宗誠爲兵部左侍郎署禮部左侍郎○調孫爾

準爲福建按察使以誠端爲江西按察使由雲南○壬申以恒齡

爲內閣學士由奉宸苑潤德爲左副都御史由大理寺卿遷○癸酉 上閱

火器營兵○諭軍機大臣等吳璥等奏黃河北岸王家溝地方溜

勢驟向北趨刷通沁溝匯注九堡馬營壩口門一摺黃河南岸蘭

儀漫口尙未歸注一處今北岸王家溝地方又復將河脣高崖刷

塌蓋難北注刷成溝槽直通沁溝匯注九堡馬營壩口門已塌寬

一百六七十丈掣溜五分有餘前派葉觀潮專辦北岸武陟漫口

乃甫將溝槽五道堵合王家溝又復刷通實屬辦理不善若不嚴

行懲治何以示儆著吳璥等卽傳旨將葉觀潮先在北岸工次枷

行懲治何以示儆著吳璥等卽傳旨將葉觀潮先在北岸工次枷

號北岸工竣再移至南岸工次枷號俾通工人員皆知儆畏俟大
工合龍再發往伊犁效力贖罪該革員誤工糜帑此時姑免籍收
著伊自矢天良先竭力措交銀兩以助工需見在北岸漫口雖已
掣溜五分餘正河尙有溜三四分著吳璥李鴻賓卽在北岸上緊
設法搶堵能使北岸不成大工則南岸漫口尙易於爲力吳璥等
務勉力辦理不可稍懈琦善此時先回南岸集料鳩工察看蘭儀
二處漫工見已歸併何處督辦盤築裹頭各事宜俟北岸工竣吳
璥等再赴南岸會同辦理可也○以松筠爲盛京將軍調和世泰
爲兵部尙書以賽沖阿爲理藩院尙書由盛京將軍遷○壬午永定河漫
口合龍○癸未以 六旬萬壽開復內外交武一二品大臣降革
留任處分有差○戊子以 六旬萬壽寬免王貝勒貝子公等降
罰處分有差賞已革禮親王昭槤豫親王裕豐四品頂帶○以禮

部堂官於 萬壽旬慶期內忌辰服色未經聲請降尙書崇祿汪

廷珍爲左侍郎左侍郎和桂王引之右侍郎周麟署右侍郎王宗

誠以正三品京堂補用○以穆克登額爲禮部尙書那清安爲禮

部右侍郎由內閣學士遷○以黃鉞爲禮部尙書轉姚文田爲戶部左侍

郎調王鼎爲戶部右侍郎以吳邦慶爲刑部右侍郎調韓克均爲

福建巡撫以毓岱爲貴州巡撫富信爲貴州布政使程贊甯爲貴

州按察使由安徽甯太道遷○轉曹師曾爲兵部左侍郎以吳其彥爲兵

部右侍郎由內閣學士遷○己丑賞已革侍郎鮑桂星編修已革巡撫張

師誠中允贊善用已革尙書初彭齡巡撫顏檢都統高杞以六部

員外郎用已革尙書吉綸侍郎凱音布翰林院侍讀學士恒福廣

西按察使張凱元以六部主事用

冬十月乙未 上六旬萬壽御太和殿受賀禮成 御甯壽宮賜

皇子 皇孫及王以下文武大臣蒙古王公外藩使臣四川土司等食 御乾清宮賜 皇后及 皇子 皇孫宴○丙申命戴均元那彥寶馳往河南查看河工那彥寶留駐馬營壩督理○丁酉 上御正大光明殿賜 皇子 皇孫及王以下文武大臣蒙古王公外藩使臣四川土司等宴並賞賚有差○庚子諭吳璥等奏從前歷屆大工均有投效之例或認辦工段或交納捐貲此次武陟大工請援照成例准令各省投效人員赴工捐輸交納豫省藩庫除准分發四省三河外其連界之山西陝西安徽湖北浙江等省並准分發自道員至佐雜分別授職等語見在武陟大工需費浩繁著照所請准令各省人員投效其如何按捐輸之多寡分別授職及分發之處仍著吳璥等查照上屆成例妥議具奏○乙巳諭軍機大臣等奏本年豫省武陟興辦大工節據吳璥等奏請

撥解工需銀九百六十萬兩連次奏報止於勘定壩基尙未興工
進占昨又據奏請暫開投效事例亦准允其所請合計給發工銀
幾及千萬又有投效人員捐貲儘足敷大工之用將來如有贏餘
工竣仍當覈實奏繳不准再請分毫慎之朕聞向來興舉大工每
於工次搭蓋館舍並開座列肆玉器鐘表綉段皮衣無物不備市
僧人等趨之若鶩且有倡妓優伶爭投覓利其所取給者悉皆工
員揮霍之貲而工員財賄無非由侵漁帑項而得此種惡習歷次
皆有惟十九年雖工較爲慎約此次吳璥等務當嚴禁浮靡將所
發帑項實歸工用不特吳璥那彥寶李鴻賓琦善四人應一塵不
染所有在工文武員弁俱當嚴行約束勿以國家重大工程爲伊
等漁利行樂之地如有違背小者枷示大者正法法在必行朕言
不再戴均元見在赴工查勘如有前項陋習伊回京時自必據實

奏聞卽數均元回京以後此數月內朕必再派員前赴工次或令人改裝易服密往察訪一經查出弊端不但將工員等從重治罪吳璥等恐亦不能當此重咎也此時工需銀兩計已陸續到工吳璥等著卽剋期興工進占定於明年桃汛前合龍如居期不能成事亦必將吳璥等治罪不貸將此諭令辦工大小官吏知之○丁未諭李鴻賓奏不勝河督重任請另賜簡放一摺李鴻賓由京員出身於河務本不諳習但旣自揣不勝河督之任則於簡放時卽當據實陳明茲已視事兩月忽奏請辭職顯係因吳璥等辦工遲緩恐將來一同獲咎豫爲諉謝地步伊旣不諳河工卽留任河督亦屬無益李鴻賓著革去河東河道總督給予郎中銜留於河南專司大工錢糧伊曾任大員僱工需內有冒濫支應之處准其直揭部科如果愼司出納辦理嚴實工竣時交吏部帶領引見候朕

施恩若不認真稽覈定行治罪不貸又諭葉觀潮前因疏防漫口革職枷號工次已足示懲見在李鴻賓降調一時簡用乏人葉觀潮平日尙諳河務加恩著卽疏枷補授河東河道總督無庸給予頂帶如能奮勉出力速蕲大工再酌量賞給降等頂帶如不知愧奮則發遣不足蔽辜必當從重治罪○諭軍機大臣等吳璥由驛遞到奏摺朕以爲必係開工日期及披閱所奏乃稱見在立限趨挑引河仍以料物未能應手爲詞欲緩至出月方始擇吉進占太覺疲玩矣朕宵旰焦勞無一日不以大工爲念卽本月初六日慶節正辰猶與軍機大臣等籌議河工情形期於桃汛前合龍乃吳璥等厯次奏報總以購料爲艱遷延觀望夫興工以購料爲急原在大吏認真督催有延玩者卽當嚴參示懲吳璥雖屬年老然以欽差駐工督催已不得諉之呼應不靈琦善係本省巡撫通省官

員皆其所屬尤應上緊嚴催迅速購運乃亦任聽所屬延緩毫無振作伊前次疏防漫口本應革職朕特予寬貸不加譴責何竟不知感奮吳璥琦善俱著先行拔去花翎戴罪圖功如果知愧知奮迅速蒧工再當量予恩施如再延玩必當立予嚴譴不稍寬貸見在給發工需銀兩幾及千萬儘足敷大工之用不准絲毫再行潰請吳璥等接奉此旨務令月內擇吉興工進占趁此天氣晴和人力易於趨辦若延至出月一遇冰雪又將藉口耽延總之桃汛以前必須合龍吳璥等擇定日期先行具奏以後進占情形仍遵前旨進占至一百丈繪圖具奏一次二百丈再繪圖具奏一次二百丈後每得數十丈卽具奏一次庶可按期計算合龍吳璥等當奮勉督辦不可再涉因循有負委任○己酉賜秦鍾英等四十一人武進士及第出身有差○庚戌諭本月二十日朕御太和殿專爲

武殿試傳臚其應行謝恩人員尙係附於是日行禮乃臚唱時一甲一名武進士徐開業一甲三名武進士梅萬清均未到班當經都察院鴻臚寺參奏交兵部查詢據稱徐開業梅萬清寓居西城是夜先至西華門因門未開啓繞至東華門以致遲誤等語各進士分住東西城是夜多有由關門進內者一甲二名秦鍾英等均未遲誤何以徐開業梅萬清二人獨未到班所言殊不足信事關典禮非尋常失誤可比本應全行斥革念其究係草茅新進徐開業著革去一甲一名並頭等侍衛梅萬清革去一甲三名並二等侍衛施恩俱仍留武進士再罰停明年殿試一科俟下屆武會試時再與新中式武舉一體殿試其本科一甲一名武進士卽以秦鍾英拔補授爲頭等侍衛一應宴賚兵部照例給予一甲二名三名均無庸再補○諭吳邦慶奏承差自京回省呈出周汝楨帶密

同鄉給事中石承藻進士汪燦書信一封不敢壅於上聞謹將原信呈覽等語吳邦慶所辦甚爲公正周汝楨係周系英之子輒敢私寄信函內外交通干與公事甚屬藐法周汝楨著查明有何頂帶卽行斥革周系英並著解任卽日押解刑部交軍機大臣會同刑部堂官審訊○辛亥諭周汝楨係副榜貢生不知讀書安分乃因湘潭土民客民互毆一案致信在籍給事中石承藻等干與公事總由周系英前曾寄信吳邦慶以致伊子效尤其失於約束咎無可辭周系英著卽行革職周汝楨著交軍機大臣會同刑部定擬具奏尋奏上得旨周汝楨著照部議杖六十徒一年周系英輕聽浮言於召對時屢次面陳又復致書本省巡撫以致伊子效尤因而獲罪周系英業經革職不准在京逗留著卽勒令回籍安分家居閉門思過如到籍後再有干與公事之處定行治罪不貸○

癸丑諭慶保奏見回長沙審訊湘潭縣商民互毆一案犯供旋認
旋翻王調松等所供情形及被殺幼孩年貌服色俱有互異等語
此案江西客民與湖南土民因此事勢同仇敵非尋常訐訟之案
可比慶保係滿洲大員江西湖南兩無偏袒惟當嚴究虛實以成
信讞至王調松鄧士湖等於殺人祭符一節旋認旋翻又焉知非
聞知周系英見已降黜頓思翻案總不可稍存成見該督卽會同
李堯棟盧衷研鞠使兩造之心俱已折服方可定案不至再有翻
控也至周系英前因致書吳邦慶降調昨又因失察伊子周汝楨
致書石承藻等革職卽日飭令回籍伊到籍後如不知安分仍復
把持干與公事李堯棟卽行據實嚴參勿稍瞻徇○乙卯以黃水
溢入運河命程國仁豫籌明年運道○丁巳命嚴覈河工議敘人

十一月己未朔諭軍機大臣等戴均元等奏馳抵武陟查看壩工引河及購運料物情形一摺本年馬營壩漫口自奪溜以來已一月有餘兩壩運貯稽料僅有一千餘垛是大工辦理遲緩竟由購料稽延所致吳璥等因屢經降旨飭催始奏於十月二十七日開工見在所購料物不過十分之一卽使儘數動用進占至五六十丈時料物不能接濟勢必停工以待所關匪細吳璥係欽差駐工料物乃巡撫專責見在撥發帑項已將及千萬陸續到工無虞缺乏朕於來往河南大臣官員時常詢問僉稱該省本年未經被水地方秋成俱十分豐稔是產料不爲不多雖距工較遠總當設法趕緊購運歷來興辦大工原不盡在附近地方採辦料物豫省本係產料之區尙謂轉運艱難豈鄰省購運轉能捷於本省耶琦善本有疏防之咎今督辦料物又如此延緩著先革去頂帶暫留河

南巡撫之任戴罪圖功卽飭所屬於附近府州廣爲購買無分晝夜轉運赴工如再有貽誤吳璥等卽行嚴參定將該撫革職治罪不稍寬貸吳璥等卽督催挑挖引河一面剋期進占務期明年挑汛以前合龍全藏大工不可遲延○庚申以海齡杜壩俱爲內閣學士

海齡由光祿寺卿杜壩由詹事遷

○辛酉命文孚馳勘山東運河並河南馬

營壩引河督催工料○甲子以齡椿爲盛京工部侍郎

由左副都御史遷

○己巳增設徐州豐汛並額外外委及周良集楊家集外委各一員裁提標五營太湖等六營兵一百二十名增設於趙莊等五集○晉封明亮三等侯爵○壬申諭朕本年六旬萬壽普免天下歷年正耗民欠及緩徵帶徵銀穀節經各督撫查明具奏以次降旨豁免內惟四川貴州二省並無絲毫帶欠特加恩寬免該二省明年正賦十分之二以示嘉獎計所蠲各省積賦全數共銀二千一

百二十九萬六千八百餘兩米穀四百四萬五千二百餘石此皆
國家惟正之供朕以大慶普惠羣黎原係特沛之恩若小民等心
冀七旬八旬九旬每屆十年必有蠲除遂不踴躍輸將州縣官更
從中影射以完作欠則大違尊君親上之義卽如此次各省積欠
銀穀數至二千五百萬之多而江蘇安徽山東三省居其過半皆
由該三省官疲民玩積習較之他省爲尤甚嗣後各省督撫應隨
時訓飭地方官催徵各宜盡職並曉諭小民應輸正賦及時完納
其情徽州縣責成督徵之員層層稽察如有捏報侵那者據實嚴
參其江蘇安徽山東三省更當整飭吏治化導民風漸除積習用
副朕仁壽斯民至意○壬午諭國家優待臣工王貝勒等例在紫
禁城內騎馬滿漢大臣年老者恩賞在紫禁城內騎馬原以曲示
體恤節其趨步之勞近聞滿州大臣中有年老艱於上馬者漢大

臣中有本不諳乘騎者雖蒙恩賞僅令人牽馬隨行嚴冬風雪依然徒步蹣跚深堪憐憫見在儀親王年逾七旬成親王將屆七旬均係朕兄定親王赫恩雖係朕姪亦年逾七旬均著加恩卽令肩輿入直慶郡王永璘俟年至六十亦准肩輿入直其例應禁城騎馬之王貝勒等及曾經賞馬之文武大臣滿洲人員年至六十五歲以上漢員年至六十歲以上者俱准其肩輿入直至應下馬處下與朕厚恤臣工若此次降旨之後應乘輿者仍徒步行走牽馬後隨則是不知朕恩其矯情之過難以寬恕其精力強健尙能策騎者亦不可因有此旨槩坐肩輿以耽安逸○除山西岢嵐等二州缺額丁銀○戊子調誠端爲甘肅按察使以程祖洛爲江西按

察使

由內閣侍讀學士遷

十二月己丑朔以同麟爲左副都御史

候補三品京堂

○辛卯嚴禁直省

州縣諱盜○乙未諭軍機大臣等慶保奏湘潭土民互毆一案見
審情形一摺據稱五月初七日本地人嘲笑戲班被江西客民毆
打經典史將受傷之本地人許一等四名交公所調養初八日江
西客民復將本地人劉一元等十五人捉進同許一等一併捆縛
等語江西客民毆湖南土民該典史既將傷重土民許一等交給
公所調養何以次日江西人復將劉一元等一同捉進捆縛此十
九人曾否被江西人戕害究竟作何下落摺內並未敘明其殺人
祭符及釘人煮人燒人各謠言見據訊係已革府書梁金堂保正
唐日新造播其意因何而起該二犯到案是否供認有無確憑此
案客民土民互毆互控謠言四播湖南紳士祖其同鄉周系英平
素鯁直以二品大員因此革職回籍慶保所訊供情若確伊自然
閉門思咎若稍有不確周系英訪得確據豈肯甘心又李堯棟另

摺內稱地方官辦理此案於江西客民驗看情形既多不實一任
地保書役從中串捏而於本地民人之挾仇故殺失察私埋多命
至今始行究出不免有化大爲小情事等語所云挾仇故殺私埋
多命各情慶保摺內並無一字提及卽此以觀慶保李堯棟會審
此案尙有意見不符之處豈足以成信讞慶保李堯棟務各屏除
成見和衷訊辦不可稍有偏執若既經擬結將來復有翻控經朕
查出恐伊二人不能當此重咎也○庚子吳邦慶以湖南巡撫任
內於湘潭商民互鬪一案不能親往查辦案懸多日降通政使副
吳芳培爲刑部右侍郎以王引之爲吏部右侍郎由通政使副○癸卯
撥兩淮商捐銀一百七十萬兩備河南工需○丙午諭軍機大臣
等董教增奏閩省廈門洋船請仍販運茶葉一摺所奏甚屬非是
前閩浙等省販粵茶葉多由海道運往經將攸鈺以洋面遠闊漫

無稽查恐有違禁夾帶等弊奏請仍照舊例改由內河行走業經
明降諭旨通行飭禁自諭禁之後洋面日見肅清海口無從偷漏
卽黠夷如英吉利不能串通奸商私相售買亦皆遵奉禁令虔受
約束爲法甚善必應永遠遵行今董教增忽請准廈門洋船仍販
運茶葉則與由海販粵何異明係受奸商慫恿冒昧陳請董教增
著傳旨申飭所奏不准行○壬子截留山東漕米麥豆十萬石有
奇備賑○癸丑免雲南銀廠通銀○甲寅免甘肅西甯口外番族
通銀○是歲朝鮮琉球越南暹羅南掌入貢○會計天下民穀數
各省通共大小男婦三萬一百二十六萬五百四十五名口各省
通共存倉米穀三千六百七十七萬三千五百五十四石四升四
合五勺

東華續錄

嘉慶四十九

臣王先謙敬編

臣周潤蕃恭校

嘉慶二十五年庚辰春正月己未諭元旦令節萬壽慶辰王大臣等呈遞如意藉伸頌祝從前俱有等差近來呈遞者太多不可不示以限制自本年萬壽暨明歲元旦爲始親王郡王貝勒無論內廷外廷行走俱准呈遞貝子公惟內廷行走者准其呈遞軍機大臣南書房翰林及內務府大臣無論品級俱准呈遞上書房行走各員俱不准呈遞大學士尙書領侍衛內大臣俱准呈遞都統在內廷行走者方准呈遞侍郎副都統俱不准呈遞御前侍衛一品者准其呈遞乾清門侍衛概不准呈遞年班來京文武大員亦惟一品者方准呈遞著通行曉諭其各恪遵毋違○辛未再增東河

稽料土方價銀○王申諭國家於年老臣工每宜格外矜憐以安
壽考然若遽令賦閒伊等自以精力尙未至頽唐不免心存戀闕
莫如節其奔走之勞俾宣力之餘無妨頤養庶於公私兩有裨益
見在大學士明亮年已八十有六尙書和甯年已八旬蘇楞額景
安俱將近八旬尙能管理部旗諸務明亮和甯景安三人著於本
管部旗直日之期照常來園其餘加班奏事引見之日俱不必來
園各在本衙門辦事蘇楞額兼管內務府事務著於本管旗部及
內務府直日之期照常進內其餘一應奏事引見之日俱無庸進
內用示朕優養耆年至意

二月己丑 上御經筵○癸巳諭禮部向例凡祭祀齋戒期內如
遇忌辰有執事及陪祀人員俱常服挂朝珠無執事不陪祀人員
常服不挂朝珠嗣後 大祀典儀無論親祭遣官遇忌辰在齋戒

期內者俱照向例行至 中祀之典朕親詣行禮者亦照向例行其遣官致祭者有執事及陪祀人員著常服挂朝珠無執事不陪祀人員仍俱穿素服著爲令○戊戌諭甘肅西甯衙門所辦案件多有與蒙古番子交涉事務乾隆六十年曾奉 高宗純皇帝諭旨將該道專用滿洲蒙古人員著爲令後經那彥成以龍萬育奏調遂相沿兼用漢員嗣後西甯道一缺仍遵照 成憲專用滿洲蒙古人員不用漢員○壬寅諭成格奏審辦逆倫案一摺此案王步雲因胞弟王步義酗酒滋事不服勸誡肆言詈罵起意勒斃向王步義之子王承彩相商王承彩聽從幫同揪按該撫於審明後業經恭請王命將王承彩凌遲處死將王步雲照律擬絞監候覈其情節王步雲起意致斃伊弟若與他人同謀則故殺期親弟妹罪止絞候今該犯與子謀父既斃其弟復陷其姪以凌遲重罪情

殊兇惡王步雲著卽行絞決嗣後遇有案情似此者俱照此辦理
○癸卯大學士章煦以疾乞致仕允之賞給全俸○命戴均元爲
文淵閣大學士加太子太保管理刑部調吳璥爲吏部尙書協辦
大學士○丁未以哈爾阿爲內閣學士由太常寺少卿遷○戊申 上閱
火器營兵○庚戌諭昨奕綸誤差退出乾清門成親王率同縣勲
來圍撞頭並自請處分又英綬釋放回京賞給上虞備用處拜唐
阿英惠具摺謝恩均屬非是前經降旨惟祖孫父子遇有加恩事
件准其具摺謝恩餘俱不准陳謝奕綸係成親王之孫但業經出
嗣卽已有閒英綬係英惠之弟似此紛紛請罪謝恩未免煩瑣嗣
後王大臣之子孫或邀恩遷擢或緣事獲咎伊祖父俱准陳謝其
餘一概不准陳謝○封湖北武昌府八分山 龍神爲宣潤敷化
之神春秋致祭○乙卯 上臨慶郡王永璘第視疾

三月甲子 上啓鑒謁 東陵○免經過地方額賦十分之三○

以兵部遺失行印命明亮降五級留任毋庸管理部旗仍留內務
府大臣戴聯奎以三品京堂用曹師曾常英以四品京堂用常福
賞給四品頂帶管理圓明園○乙丑 上詣 明成祖宣宗孝宗
陵奠酒○諭前明諸帝陵寢會奉 皇考高宗純皇帝特諭重修
並 親臨永樂陵閱視酌奠朕仰紹 前謨於嘉慶九年亦曾躬
往申奠並飭諭地方官嚴禁樵蘇時加修葺本日朕鑾輅經臨再
往致祀因念弘治宣德二陵俱列祀典卽與永樂陵一同躬臨奠
醑並閱視棧枋牆垣規制煥然松楸亦屬蔥鬱皆由我朝 列聖
德侔天地優待勝國實爲從古所未有我萬世子孫允當恪遵
成憲祀事聿修以副祇守 前徽恩禮前朝之至意○丁卯諭朕
弟慶郡王永璘幼齡時仰蒙 皇考高宗純皇帝鍾愛每逢 巡

省必蒙 考命同朕及成親王隨扈共荷 恩慈因伊幼年讀書

資性稍次騎射亦未甚嫻習仍邀 眷愛封爲貝勒朕親政後晉

封爲郡王因其材質中平亦未令管理事務至今二十餘年府第

優閒安分守己謹慎小心甚屬可嘉今春患病命皇子連次看視

二月二十九日朕親往視疾本日據英和等奏伊病勢沉重幾至

不起朕心深爲感動慶郡王永璘著加恩晉封爲慶親王以示優

眷並著載銓卽日馳往面宣恩旨或伊聞而欣慰從此病勢漸瘳

朕所深望焉○戊辰以劉鐸之爲兵部尙書汪廷珍爲左都御史

王宗誠爲禮部左侍郎品候補三○以阿克當阿吳邦慶俱爲兵部

左侍郎阿克當阿由內務府轉
管吳邦慶由通政使遷○以哈爾阿爲兵部右侍郎由內
閣學士

遷○己巳諭朕弟慶親王永璘秉性素醇持躬謹飭初蒞時仰蒙

皇考鍾愛封爲貝勒朕親政後誼篤宗親晉封郡王自本年正

月偶嬰微疾特命皇子連次看視二月閒聞病勢沉重朕復親往臨視面宣溫諭昨因病日危篤晉封爲親王當派載銓馳往宣旨方冀聞而欣慰從此沈疴漸起茲於本日申刻據英和等奏到慶親王於十三日卯刻薨逝覽奏深爲痛悼前因伊病勢加劇豫派英和阿克當阿經理其事並諭英和等察看病勢或至不起俟其薨留之際向其傳述諭旨一切身後事宜俱係官爲經理昨英和等已傳宣恩意想慶親王聞之自可藉慰泉下矣見值朕祇謁

東陵未能卽日親往賜奠著二阿哥四阿哥於十四日前往奠醑二阿哥先行代朕致奠畢再同四阿哥自行酌酒行三叩禮十五日著三阿哥奕緯阿哥前往行禮致奠阿哥等於到府門時俱服用青袍褂帽摘纓出門卽易常服戴纓帽慶親王長子縣愍於百日孝滿著卽襲封慶郡王次子縣悌縣性百日孝滿卽賞給四品

頂帶至初祭大祭奉移儀節俟奏到之時再行遣官致祭所有一切喪儀典禮著各該衙門卽行察例具奏尋諭曰僖○庚午諭朕每年祇謁 東陵俱派慶親王永璘隨扈間遇駐蹕盤山朕拜廟時慶親王必常隨從或遇賞飯亦必與賚予此次朕祇謁 東陵再莅盤山慶親王遽經薨逝撫今思昔愴然於懷若仍照常駐蹕五日於心益覺悽愴著改於二十日自盤山啓蹕回鑾二十二日進城卽親臨慶親王府賜奠所有執事人員俱穿青袍褂帽摘纓禮畢後是日駐蹕 雍和宮無庸設儀仗作樂隨扈之王公大臣官員等仍俱服行衣在京諸王大臣官員無庸至朝陽門接駕亦不必至 雍和宮請安二十三日回蹕圓明園仍設儀仗作樂王大臣等照常接駕所有隨扈王大臣官員仍俱服行衣○王申

上謁

昭西陵

孝陵

孝東陵

景陵

裕陵○癸酉

上幸

盤山○程國仁因病解任調錢臻爲山東巡撫以瑞弼爲江西巡

撫韓文綺爲江西布政使章凱爲四川按察使

由永甯道遷

○丁丑河

南馬營壩漫工合龍加吳璥太子少保○以那彥寶爲鑲藍旗漢

軍都統調禧恩爲戶部右侍郎文孚爲戶部左侍郎以海齡爲刑

部右侍郎

由內閣學士遷

○戊寅

上還京師臨故處親王永璘府賜奠

○己卯調吳芳培爲兵部左侍郎吳邦慶爲刑部右侍郎○甲申

諭豫省南岸儀封三堡復刷成漫口續塌至一百三十餘丈吳璥

等於北岸合龍後遲延十餘日並不趕赴南岸迅速籌辦均難辭

咎吳璥著革去太子少保銜以協辦大學士吏部尙書署理河東

河道總督那彥寶革去都統降補內閣學士署理河南巡撫均撤

回議敘葉觀潮著革去河道總督留於工次效力贖罪琦善著革

去巡撫賞給主事銜隨同吳璥等辦理大工俟合龍後回京以刑

部主事用

夏四月丙戌朔翁元圻以年老命留京以左輔爲湖南布政使葉

汝芝爲浙江按察使

出山西河東道遷

○癸巳諭吳璥年老不能耐勞河

督事務較繁精力恐難周到河東河道總督著張文浩以道銜署理專駐豫省籌辦大工及黃河隄岸各事宜其山東運河事務仍著李鴻賓署理分任其事吳璥俟張文浩到任將豫省應辦工程籌畫周妥交代後卽馳驛前往江南查勘高堰水勢工程情形回京供職○甲午 上臨曹八里莊故慶親王永璘殯所賜奠賞其子縣悌縣性三品頂帶○丙申以舒甯爲內閣學士

由太常寺卿遷

○己

亥 上閱健銳營兵○調姚祖同爲河南巡撫以吳邦慶爲安徽

巡撫程國仁爲刑部右侍郎

前任山東巡撫

○壬寅諭本年三月初七日

兵部查知行印被竊初八日在湯山具奏實屬奇事必應立時嚴

訊刻不容緩當卽降旨交縣課等會同刑部堂官審訊乃縣課等因循怠玩疲惰性成遲至數日始將兵部吏役等傳齊到案此數日內該部司員以及吏役人等業經串就供詞取口如一而承審之堂司各官又不卽時認真推鞠卽如鮑幹於初七日請行印時乍知失印並無慌張情狀轉以車駕司行印擔抵並將同進庫之任安太指爲犯三此等情節於到案時卽應究出乃延宕月餘始行訊有此供豈非故縱致令苟延乎況旣得此供仍不加緊嚴訊轉稱鮑幹氣體虛弱未便刑求藉詞展緩縣課等於派審此案因循疲玩推諉遷延實屬咎無可辭本日因日久未能審出實據奏請議處冀圖另派他人脫然事外此等伎倆豈能逃朕洞鑒乎縣課等無庸交吏部都察院議處縣課英和和甯韓封俱著先行拔去花翎曹振鏞和甯韓封俱著降爲二品頂帶英和素日辦事較

勝於彼姑留頂帶俟五月再降恩甯王鼎海齡俱著降爲三品頂帶所有派審司員等俱著摘去頂帶仍責令上緊研鞫此案經伊等集訊多日犯供屢改展轉游移斷不能另行派人審辦將來卽將伊等全行斥革仍必令將此案究出實情方能卸責著再限至五月初五日縣課等三人每日赴刑部衙門會同該堂官督率司員等將各犯證晝夜熬審自降旨之日爲始縣課等及刑部堂官俱不准來圍奏事吏部引見人員著托津帶領刑部應奏事件著司員送圍交戴均元具奏縣課英和和甯所管旗務俱交該旗副都統來圍具奏步軍統領衙門應奏事件著左右翼總兵具奏內務府引見奏事該總管大臣尙有數人英和亦不准來圍如初五日以前或究出正賊或起獲行印奏上時必當立予開復如仍不能審出實據朕於初六日再降旨治伊等之罪懷之慎之○乙巳

諭兵部遺失行印一案審訊日久尙未究出正犯昨據縣課等推
鞠該衙門平日直宿請印情形奏稱該部當月司員夜閒並不直
宿閒有一二人在署過夜亦係一早回家其堂印及庫門鑰匙盡
則由該班之莫卽戈掌管夜則歸當月科直宿書吏收存作弊甚
易又查出該部庫後圍牆有新堵門形係該部阜隸黃勇興於上
年九月十一日娶子媳開啓直通街外本年三月初七日堵砌黃
勇興旋於四月初一日病故等語各衙門當月司員在署直宿庫
門印鑰卽其官守乃並不自行監管全委之吏役人等聽其取攜
自便啓閉隨時至官廨爲辦事公所門戶牆垣關防緊要乃以阜
隸賤役輒敢穿穴圍牆自開門徑其娶媳之花轎嫁裝竟穿衙門
而走而堂司官竟毫無見聞全同木偶實屬溺職卽此二事可見
該衙門廢弛已極所有當月司員係每日更換俟審明失印日期

再將是日直宿司員從重懲處其平日任聽官吏懈玩漫無覺察之各堂官實屬咎無可追戴聯奎等雖經降調不足蔽辜仍交部嚴加議處松筠和世泰俱著交部嚴加議處普恭於三月初三日署任雖僅數日亦著交部議處各員之罪限五日內具奏阜赫黃勇興私開牆門本應從重治罪業經身故倖免於法其開門之日失察之該管司務著查明卽行革職自上年九月初三日起至本年三月初七日止該部當月司員不自行收管印鑰怠惰玩公積習甚爲可惡俱著永遠停升其有記名應升及加級紀錄議敘之處一併撤銷以示懲儆尋議上得旨兵部庫後圍牆該衙門阜役輒敢私開門徑直通街外娶媳花轎任意行走自上年九月至本年三月新任堂官始行堵閉該部堂司各官漫無覺察廢弛已極除司務二員業經革職外吏部議將各該堂官照溺職例革職實

屬咎所應得但念其過究與私罪有閒尙不至全行罷斥松筠著革去盛京將軍降補山海關副都統仍帶革職留任俟新任將軍松甯到任交卸後卽赴山海關本任不准來京謝恩和世泰著革去宮銜紫禁城內騎馬御前侍衛兵部尙書正藍旗滿洲都統留總管內務府大臣之任管理茶膳房清漪園等處事務仍帶革職留任普恭署任數日著改爲降三級留任戴聯奎常福曹師曾常英前已降調俱著改爲革職留任○戊申以伯麟爲兵部尙書仍協辦大學士調慶保爲雲貴總督以張映漢爲湖廣總督調毓岱爲湖北巡撫以明山爲貴州巡撫孫爾準爲福建布政使舒靈阿爲福建按察使

由浙江杭嘉湖道遷

○庚戌賜陳繼昌等二百四十六人進

士及第出身有差○辛亥諭兵部遺失行印一案三月初八日兵

部於湯山具奏其時朕卽以行印專爲隨營攜帶鈐用而設必係

上年秋園途間遺失或被盜竊當卽傳旨令將行在上年曾經隨園之兵部書役莫卽戈他庫什等押解回京交留京王大臣會同刑部審訊縣課等查訊月餘總稱行印確於上年九月初三日驗明貯庫其遺失在入庫以後因而忽指爲偷竊舞弊忽指爲藏匿陷害疑竇百端供詞日變愈遠愈幻舍正文而旁求迄未究出實情經朕嚴諭縣課等及派審司員分別降革頂帶飭令晝夜推鞫始據訊明行印確於上年八月二十八日在巴克什營地方遺失看印之捷報處書吏於失印後用備匣加封頂充並賄屬兵部堂書鮑幹合混接收當月之司官並未開匣驗視入庫後鮑幹復裝點在庫被竊情形以圖抵卸取供脗合厯厯如繪見據縣課等呈遞各供先請將松筠裕恩兵部堂官分別嚴議議處察議司員分別革職議處此案兵部當月司員何炳彝慶祿二人於行印交到

時並未開看乃初次到案卽合詞堅執開匣點驗並捏稱慶祿以手彈印錚錚有聲何炳彝戲言並非石頭何須彈試以質其事且慶祿訊供時復稱如果收時匣中無印願以頭顱作抵抗言申辨在伊二人止圖規避未經點驗處分造作謊言以致承審之王大臣等俱信以爲實專在入庫以後追尋被竊情由而於收印以前情迹轉以爲無須再問是此案拖延日久全爲伊二人所誤其情甚爲可惡何炳彝慶祿俱著革職何炳彝發往吉林慶祿發往烏魯木齊效力贖罪慶祿又有願以頭顱作抵之言直同光棍訛賴尤爲可惡著先行枷號一箇月滿日卽行起解以示懲儆捷報處郎中五福喜輪直晚班典守行印乃假手書吏致有疏虞並於書吏抵充舞弊毫無聞見送印之筆帖式中斂並不點驗交代致被欺蒙均著照所議革職其輪應早班之郎中恒泰在圍失察遺失

印信著交部議處至各部院行在印信向係管帶印鑰之堂官自行存貯此次松筠率委之捷報處司員而該司員又委之書吏以致遺失松筠之咎甚重松筠著革去山海關副都統以該旗公中佐領用有缺補授無缺在旗候補裕恩上年署理行在兵部侍郎咎亦難辭著退出乾清門革去侍郎前鋒統領副都統仍留鎮國將軍隨旗上朝和世泰戴聯奎常福曹師曾常英前已分別降調此次著免其議處普恭亦著免其察議其交審此案之縣課等見已審出實情縣課英和俱著賞還花翎和甯韓對著賞還頂帶花翎曹振鏞恩甯王鼎海齡俱著開復原品頂帶刑部及各衙門派審司員等俱著給還頂帶兵部行在印信著交禮部卽行補鑄將印文印式較舊印量爲改易以示區別應用銀兩及鑄造工費著松筠裕恩二人賠繳所有案內舞弊捏供之書吏人等仍交縣課

等會同刑部按律分別定擬具奏尋議上得旨此案書吏俞輝庭因在帳房睡熟以致行印被竊若彼時卽行稟報其罪本不甚重乃輒以備匣加封抵充復賄屬堂書鮑幹蒙混接收實屬狡詐鮑幹受賄扶同隱飾又裝點在庫被竊情形詭譎多端尤爲可惡俞輝庭著加枷號一月滿日發往伊犁給種地兵丁爲奴鮑幹著枷號兩月滿日改發黑龍江給兵丁爲奴餘俱照擬完結書吏王振綱首先供明行印另有備匣一分從此究出實情著審案之王大臣等公賞給銀十兩並交兵部存記俟王振綱役滿之日咨送吏部以應得之職儘先選用○以那彥寶爲理藩院右侍郎由內閣學士遷

○王子諭朕每屆巡幸啓蹕內閣學士請寶著總管太監先將寶匣當同該學士啓視再行扃封交令祇領回鑾時亦著該學士將寶匣當同總管太監啓視扃封再行交進以昭慎重○諭兵部行

印審明係上年八月二十八日在巴克什營遺失維時松筠管帶行在兵部印鑰其行印本應收存松筠帳房用印時令司員等赴帳房請用乃松筠率委司員收管司員又委之書吏以致遺失弊混事閱半年懵無知覺是此案實因松筠蠢而智昏怠氣所招其咎最重故罰亦如之裕恩署理行在兵部侍郎失察在途失印罰應次之至和世泰戴聯奎普恭常福曹師曾常英失印一事均與之無涉其咎在失察當月司員不行開驗印匣半年以來毫無知覺又失察周恩綬私換割付黃勇興私啓署牆合衙中相率聚賭其咎亦重但較之失印爲輕其罰自應寬減各衙門頒給印信典守基重部院堂官初到任時例應瞻拜聞有兼拜行印者有不拜行印者向不畫一嗣後凡設有行印衙門遇堂官到任時令將行印與堂印一併捧至大堂啓櫝陳設於上一同瞻拜其行印回署

時並令該衙門堂官一人驗收以昭信守

五月壬戌調張志緒爲四川按察使章凱爲廣西按察使○戊辰

以耆甯爲內閣學士

由太僕寺少卿遷

○庚午諭本日據阿克當阿代慶

郡王蘇戀轉奏伊府中有毗盧喇門口四座太平缸五十四件銅路鎧三十六對皆非臣下應用之物見在分別改造呈繳國家設立制度辨別等威一名一器不容稍有僭越慶親王永璘府第本爲和珅舊宅此等違制之物皆係當日和珅私置及永璘接住以後不知奏明更改相沿至二十年之久設當永璘在日查出亦有應得之咎今伊子蘇戀甫經襲爵卽知據實呈報所辦甚是所有毗盧喇門口該府業已自行拆改其交出之太平缸銅路鎧著內務府大臣另行擇地安設並通諭親王郡王貝勒貝子及各大臣等會典內王公百官一應府第器具俱有定則以昭限制如和珅

之驕盈僭妄必至身罹重罰後嗣陵夷各王公大臣等均當引以爲戒凡邸第服物務恪遵定憲謹慎自持甯失之不及不可稍有僭踰庶幾久膺爵祿永保令名也○辛未諭御史邱煌奏請禁科道遇缺奏事一摺所奏非是朝廷設立言官遇有應奏事件原許不時入告如其言果是卽奏章一上朕必獎勵優加儻撫拾浮言雖累牘不休亦不能遽邀識拔每次引見給事中朕所簡用之人非但不論開列之先後實不計條陳之多寡也若如該御史所奏遇有給事中缺出未經引見之先卽不准御史呈遞封章是將使言官瞻顧徬徨相率緘默且又稱實係機密重務仍許入告設言官奏事專爲圖謀進階將必有以緊要事件故意延閣俟有科缺始行呈奏者又將何以辨其真僞耶總之言官奏事其心當爲公而不爲私轉不必豫存避嫌之見如該御史摺內聲明見有漢給

事中一缺業已呈明扣除引見是又近於取巧殊可不必也○癸酉諭戶部題銷恩賞直隸兵丁錢糧一本嘉慶十二年恭奉 皇考高宗純皇帝實錄 聖訓前赴盛京尊藏禮成朕普錫恩施內有賞給沿途護送兵丁半月錢糧一款乃遲至本年始行題銷計已越十三年之久外省於應行報銷事件任意耽延因循疲玩相習成風而直隸爲尤甚屢經降旨訓飭恬不知改非明定處分不足以示儆著吏兵二部酌議嗣後各省題銷事件遲延在三年以內者免議其有越三年以上者分別議以罰俸六年以上分別議以降調九年以上卽行革職酌定條款奏准後通飭各直省一體遵行尋議上得旨吏兵二部會議題銷遲延處分條款內遲延三年以上者著改爲罰俸一年四年以上者改爲罰俸二年五年以上者改爲罰俸三年其六年以上均照所議分別降革吏兵二部

一律辦理至題銷冊籍舛錯經部駁查准其分別扣除程限吏兵
二部亦一律辦理以歸畫一○丙子諭軍機大臣等錢臻奏酌擬
整飭章程一摺據稱東省積習民不畏官官轉畏民畏民之弊更
甚於不愛民究其致弊之由皆因上司不能正本清源以致官愈
怯而民愈驕此時欲加整飭先在辨上下定民志使民不敢犯上
等語所奏俱是地方官之於百姓猶父母之於子子非生而忤逆
因父母不善訓誨日漸縱恣使然爲地方官者果能周恤民隱聽
斷勸明官知愛民民亦知畏官則大順之象成若冠履倒置則其
象爲逆該撫此時力加整頓總在使官能展其猷爲民無可施其
挾制挽其逸者而使之順而其要尤在於嚴拏訟棍蓋民之敢於
告訐頻仍皆訟棍唆之使然訟棍斂戢則民氣自靖矣至所稱擬
請嗣後東省京控戶婚田土之案及雖係重案在本省控告未經

投審者無庸奏咨斟酌駁斥一節則事屬難行民人赴京具控之
案情重者奏請交辦情輕者咨回本省乃各省之通例若不行奏
咨一槩駁回將行之山東一省乎抑行之各省皆然乎況來京具
控之案豈必盡屬虛誣若真有含冤負屈者悉皆壅於上聞是因
噎廢食也如謂東省民情刁健京控之案或奏或咨俟案犯解回
本省審明實係虛妄較之常例再加重治罪以儆刁風可也

六月辛卯諭朕每次巡幸隨帶御寶俱安庋寢宮次日啓蹕之先
始行捧出交請寶之內閣學士祇領恭齋前行各衙門隨帶行印
該堂官自應親司收貯上年兵部行印因松筠未經收貯帳房以
致中途遺失嗣後行在各衙門所帶印信俱著在管帶印鑰之堂
官帳房內晝夜存貯次日啓行時該衙門官役親往領取齋押行
走不准先一日齋赴前行以昭慎重違者重處不赦○壬辰諭那

彥寶奏審訊已革教諭李訓控案該革員仍戴頂帽不服審問當堂挺立大肆咆哮見將該革員除去頂帽鎖鐐收禁等語此案自上年八月據程國仁參奏當卽將李訓革職交該撫審辦乃數月未經審結已屬遲延又不將該革員摘去頂帶嚴行管押任其公然戴頂出入自由此與未經革職者何異是該革員之敢於當堂咆哮不服審訊皆程國仁因循軟弱縱之使然屬員既不畏上司小民復不畏官長壞法亂紀端有由開程國仁豈能復勝侍郎之任著以六部郎中降補以爲大員不遵法度市惠沽名者戒○以韓文綺爲刑部右侍郎賞張師誠四品頂帶爲江西布政使中右○甲午諭向來在京發遣官犯俱於奉旨之日卽時押令起程乃外省發遣官犯往往藉交代未清爲詞經年累月任其逗留啓其刁詐實屬延玩著通諭直省文武大員嗣後發遣官犯於奉到

諭旨之日卽勒令起解不許片刻停留如有交代未清事件該管
上司另行覈辦其官員革職者奉旨之日卽行摘去頂帶拏問者
奉旨之日卽令上鎖收禁均照定例遵行儻有仍前市恩寬縱者
一經查出卽行革職不赦懷之○調張師誠爲安徽布政使高孚
爲江西布政使○召鄒瀚來京調德奎爲安徽按察使賞琦善四
品頂帶爲河南按察使抽候補○乙未郡王銜貝勒縣勲薨贈郡
王命 皇次子智親王往奠賞銀一千兩治喪○壬寅諭定例追
封王等槩不予諡縣勲係追封郡王禮部本不應將撰擬碑文建
立碑亭之處率行具奏嗣後凡追封王等該部均無庸請諡立碑
○癸卯諭朕夙聞慶親王府內尙有外諸達二員一名碩羅一名
僧克依皇子始有諸達慶親王於乾隆年間封王分府後尙可設
有諸達迨至嘉慶年間仍有諸達則於例不合所有慶親王府諸

達碩羅僧克依二名卽行裁汰並著該管大臣驗看該員等如能當差卽著仍在原充差使上行走如已年老不能當差卽以原品休致或竟行革退具奏請旨辦理仍著宗人府查明近支王公府內如尙設有請達者俱照此裁汰著爲令○丙午諭松甯奏審明已革驍騎校溫程喝令毆斃宗室喜受一案另行定擬並附參原審各員一摺此案溫程明知喜受身係宗室喝令攢毆致斃瑞麟等將溫程擬以流罪而以共毆之劉二標子擬抵經刑部議較當降旨交松甯另行審擬具奏茲據松甯奏將喝令主使之溫程照毆斃宗室律擬以斬候聽從下手之劉二標子照爲從律擬以杖流並餘犯各罪名均屬允當俱著照所擬辦理瑞麟年老無能前錯擬罪名係伊主稟其咎較重著交部嚴加議處卽行來京聽候部議松筠額特布會銜具奏俱著交部議處喜受係屢經犯事之

人該管族長紹昌不嚴行看管縱令私出醜命著交宗人府嚴加
議處刑部議駁此案甚是著刑部堂官查明主臬司員姓名具奏
加恩賞加一級以示鼓勵刑部堂官俱著加恩寬免罰俸二年尋
議上得旨瑞麟前在浙江布政使任內因年老調京嗣簡放奉天
府尹值朕臨莅盛京伊承辦差務尙爲奮勉擢用盛京刑部侍郎
乃兩年以來瑞麟所辦刑名事務錯誤甚多不但此次溫程毆斃
宗室喜受一案所擬罪名顛倒舛謬卽如其奏文凌自縊一案不
查取文凌家信原委又失察筆帖式相圖等侵分贓罰鹿茸價值
種種昏愎不勝侍郎之任著以六部員外郎降補額特布於錯擬
溫程罪名率同畫題亦著以六部員外郎降補松筠自前歲奏阻
朕巡幸盛京恭謁祖陵喪心病狂乖謬已極伊從此卽褫薄災
生彼時未將伊嚴譴降授察哈爾都統到任後卽爲伊所屬協領

請賞花翎一味市恩邀譽見今諸臣爲其所惑者頗多並有稱伊
爲師者嗣復簡用御前大臣兵部尙書又於行在遺失印信其在
盛京將軍任內中前所沙河所盜賊肆行全無整頓又凌相圖之
案亦漫無覺察此案復率爾會銜具題種種孤恩忘職不能再邀
寬貸投閒置散實不爲過松筠著以本旗驍騎校降補○以承光
爲盛京刑部侍郎麟祥爲湖北布政使明安泰爲江蘇按察使由
西左江道遷○戊申諭本日慶親王永璘之子縣愍縣悌縣性百日釋
服詣宮門謝恩朕召見縣愍等三人憶及慶親王心甚惻然縣悌
年甫十齡詢以消語俱略能奏對所肄漢書見讀至下論語察其
資性尙爲聰穎著加恩在上書房伴讀該衙門卽於編檢內遴選
授讀之員帶領引見七月初四日與縣悌同入上書房再慶親王
第五女本日進內謝恩甚屬端莊朕膝下見無公主頗覺寂寞著

留於宮內交皇后撫養亦著於是日進內將來遣嫁時一切事宜
官爲辦理以示朕篤念懿親至意○己酉諭給事中葉繼雯奏擬
絞犯婦情有可原刑部不應列入秋審情實一摺所奏甚屬非是
此案保杜氏因伊翁保三雄利貨縱伊與保緒文暨賈生俊先後
通姦該氏恐妬姦生隙告知伊翁移避致伊翁被保緒文踢斃該
給事中以保三雄之死非杜氏意料所及鐵商刑部改緩刑部援
引歷辦服制案件礙難改緩咨覆刑名之案遇有倫紀攸關者刑
部執法定擬例應擬實至情節不同將來句決時其權衡出自上
裁若如該給事中所奏服制之案此類甚多若俱擬緩決不但有
紊成例朕亦無可免句之案矣葉繼雯不勝御史之任著以吏禮
兵工四部員外郎補用○辛亥諭前據方受疇奏李長幅等冒充
儀親王府護衛捏造諭帖赴河間縣求免派差等情一案當將原

奏令軍機大臣交儀親王閱看旋據儀親王將李長幅拏獲奏交刑部審訊據李長幅供稱伊女係貝勒縣志之妾伊冒充護衛赴河間縣詐求免差縣志實不知情後逃回向縣志懇求庇護經縣志斥言不能相救等語除本案俟人犯解齊刑部審明另行定擬具奏外宗室王公等納妾向俱於該管包衣莊頭家挑選縣志私買民人之女爲妾事前並未稟知儀親王直至生子始行稟明已屬不合李長幅因在縣志處往來輒敢冒寫儀親王諭帖擅戴翎頂假冒職官回籍詐騙及逃走回京向縣志懇請縣志又不卽時回明儀親王究辦遷延多日經朕將方受疇原奏令儀親王閱看儀親王始知有此事縣志種種錯謬實屬咎無可辭縣志著革去郡王職銜仍留貝勒退鎮藍旗漢軍都統署正紅旗漢軍都統並拔去花翎仍罰貝勒俸四年作八年扣繳以示懲儆其宗室王公

等有買民人之女爲妾者已往不究此後槩行禁止如有違者應作何懲處之處著宗人府定議具奏尋議嗣後親王至奉恩輔國公有私買民女爲妾者一經查出卽行革爵再包衣參領佐領本有積察包衣人丁戶口之責該員等應隨時稽察如王公內生有子女並請封側福晉側夫人側室等事均責成該員將所生子女之生母其母家旗分佐領姓氏三代開寫清冊鈐用關防圖記限三日內呈報臣衙門辦理儻王公有私買民女爲妾及生有子女捏報包衣女子所生等事該員等豫行查出呈報者免議如未查出或竟附和捏報一經發覺卽將該員等照例交部嚴加議處從之○甲寅轉那清安爲禮部左侍郎以和桂爲禮部右侍郎

理

由大
理寺

東華續錄

嘉慶五十

臣王先謙敬編

臣周綸蕃恭校

秋七月戊午諭賈允升奏各省京控案件請降旨不准發還一摺所奏非是各省民人赴都察院控告案件向來有奏聞者有咨回者有駁斥者嘉慶四年朕降旨不准駁斥以防壅閉係指案情重大者而言若如賈允升所奏無論案情大小不准駁斥卽不准發還則一切戶婚田土錢債細事一經京控悉皆奏咨辦理亦於政體非宜國家設官分職大小相維若以部院衙門理及瑣屑之務則直省地方官所司何事且近來訟風日熾使奸民臆計赴京控訴必當一槩准理豈不益長刁風倍增訟獄拖累株連流弊更大賈允升所請不准發還控案之處著無庸議惟都察院向有一兩

月彙奏咨案之例嗣後凡發還案件著存記檔冊摘敘案情一兩月彙奏一次卽可防掩重爲輕之弊其近京旗民控告細事札交五城司坊審斷者仍照舊例辦理無庸彙奏○已未諭成親王奏縣勲之第五子奕繁於本月初一日病故查奕繁亦有未經命名之子其不行呈報係縣勲主意特自行檢舉請交宗人府治其失察之罪等語縣勲生有二子不報知成親王伊子奕繁生子向伊告知伊又不令報知成親王如縣勲尙在自當治以應得之罪今伊已身故著無庸議成親王先未知悉所有自請交議之處著予寬免奕繁之子卽由成親王自行命名照例呈報成親王府第一月之內查出匿報孫曾三人前歲怡親王奕勲身故後亦曾查出匿報子女多名以此類推各王公家所生子女未經報出者恐尙不少宗室枝葉繁衍最爲盛事該王公等匿不呈報不知是何意

見該族長總族長等耳目切近何至全同聾聵毫無見聞著通諭宗室王公等凡生有子女俱各遵例卽行呈報管理宗人府王公及各族長等亦隨時稽察如有匿不呈報者該族長一經查出立卽補報宗人府並將該王公指名參處以示懲儆○庚申特通阿卒以斌良爲陝西按察使

由江蘇
禮道遷

○乙丑諭向來恭值

壇廟

大祀王公大臣官員及太常寺執事各官滿洲人員內有二十七箇月服制者是否俱不應恭與其滿漢各員有期年服制者亦皆恭與與否著禮部太常寺詳查舊例若何新例若何分晰開單具奏尋奏上得旨王公大臣官員滿洲人員內有二十七箇月服制者朝會祭祀之禮仍一槩不與惟太常寺官員熟諳禮儀者本屬無多若照新例二十七箇月服制之內槩不與祭恐致不敷當差著仍依舊例百日後照常供奉祭祀至御前乾清門大臣侍衛等

有二十七箇月服制者百日後恭值 郊壇大祀祭前一日著仍穿蟒袍補褂隨至齋宮護衛值宿祭日著穿常服各在上馬處祇候禮成後再一體扈從其滿漢各員有期服及大功以下者不與祭日期俱仍照舊例行○以李宗昉爲內閣學士由題○己巳命督撫屬員有劣迹顯著及才不勝任者據實劾參不許勒令告病○壬申 上啓鑾秋獮木蘭○免經過地方額賦十分之三○甲戌諭本日據方受疇奏稱深州地方秋禾多有雙穗至十一穗者摘取二十莖進呈朕敬憶 皇考高宗純皇帝實錄內載乾隆年間河南省曾經奏進雙穗四穗嘉禾 聖諭以爲凡土壤肥沃之處又值雨膏霑足其發生茂勃則一本數穗亦事所恒有不必侈言嘉祥惟以未經成熟之禾遽行摘取轉使數莖嘉穀置之無用殊爲可惜仰見我 皇考貴粟重農不尚祥瑞之至意本年雨暘

時若直省年穀順成多登上稔朕心深爲忻慰國家以豐年爲瑞何必以雙歧合穎謂爲美談且此所進二十莖亦未免虛耗物力嗣後各直省遇有瑞麥嘉禾但當據實奏聞不可稍加粉飾槩無庸摘取進呈用副朕務本崇實仰紹前徽之意○戊寅 上駐蹕避暑山莊 聖躬不豫○己卯 上不豫 皇次子智親王

皇四子瑞親王歸忻朝夕侍側 上仍治事如常○以朱士彥

爲內閣學士

由少詹事遷

○嚮夕

上疾大漸召御前大臣賽沖阿索

特那木多布齋軍機大臣托津戴均元盧蔭溥文孚內務府大臣福恩和世泰公啓鐫匣宣示嘉慶四年四月初十日立皇太子

御書諭旨戊刻 上崩於避暑山莊行殿寢官 遺詔曰朕仰蒙

皇考高宗純皇帝授璽嗣位親承 訓政三年惟以敬 天法

祖勤政愛民爲保邦制治之大經履位以來嚴恭寅畏惟日孜

三
我思 天立君以爲民以養以教實在一人親政之初值川陝楚

邪匪未靖訓勵統兵大員整飭戎行籌筆四載通寇以次殲除嗣
是海宇乂安閭閻樂業朕懷保惠鮮與民休息乃十八年復有奸
民作慝闌入禁門逆黨勾連曹滑蔓延三省幸賴 上天佑順渠
魁捕戮餘孽殄除爲期曾不再月中外肅清朕深思教匪之害民
屢申訓諭以肅吏治以正人心整綱飭紀期於政清而俗厚蓋未
嘗一日釋諸懷也黃河自古爲中國患先是雲梯關下海口墊淤
下壅上決屢有漫溢之儼朕不惜帑金隄防疏濬俾復故道奏安
瀾者越六七年上年秋霖異漲豫河南北漫口數處而武陟橫流
穿運入海爲害最重今春督治甫告成功而南岸儀封復潰飭諭
河臣於秋後興築業已程工撥帑計今冬可期歲事朕軫念民生
惟懼一夫失所遇四方水旱之災蠲租發粟隨奏輒下上年朕六

旬正慶薄海臣民臚歡獻祝愛戴出於至誠朕思逮以實惠詔蠲免積欠銀穀凡二千餘萬以期家給人足共登熙皞今歲自春徂夏以及於秋暘雨應時各省皆報豐登朕心豫悅孟秋中旬恪遵彝訓將舉木蘭獮典先駐蹕避暑山莊朕體素壯未嘗疾病雖年逾六旬登陟川原不覺其勞此次蹕途偶感暍暑昨仍策馬度廣仁嶺迨抵山莊覺痰氣上壅至夕益甚恐弗克瘳朕仰遵

聖家法曾於嘉慶四年四月初十日卯初豫立皇太子 親書

密緘鋪置祕圖十八年禁門之役賊踰宮垣皇太子手發火槍連斃二賊餘黨驚墜禁籞獲安厥功甚鉅因建儲之命未宜先封智親王以獎殊庸今疾彌留神器至重允宜傳付乃命御前大臣軍機大臣內務府大臣公啓密緘皇太子仁孝智勇必能欽承付託其卽皇帝位以嗣大統爲君之道在知人在安民朕嘗論之詳矣

然而行之實難其深思而力持之登進賢良愛養黎庶以保我國
家億萬年丕丕基記曰孝者善繼人之志善述人之事可不勉哉
朕貴爲天子年逾周甲獲福亦云孔厚惟我後嗣克承予志使天
下永享太平之福則朕之願慰矣朕受璽後二兄一弟同予侍養
今春慶親王先逝自茲存者惟儀親王成親王遂不獲相見其二
王一應罰俸處分著槩予寬免書載虞舜陟方古天子終於狩所
蓋有之矣况濬陽行宮爲每歲臨幸之地我 祖 考神御在焉
予復何憾喪服仍依舊制二十七日而除布告天下咸使聞知○
八月乙巳奉移 梓宮至京○十月甲辰恭上 尊諡曰 受天
興運敷化綏猷崇文經武孝恭勤儉端敏英哲睿皇帝 廟號
仁宗○道光元年三月癸酉午刻葬 昌陵 上在位二十五年
聖壽六十有一 上英察果斷寬仁大度親承 訓政三年

爲曠古所未有 親政之初除巨奸祛壅蔽其時川陝楚三省教
匪日久稽誅乃嚴逗留之罪懲飾奏之風信賞必罰軍威立振越
四載大功告成歲 高廟未竟之緒雖軒皇版泉帝堯丹水猶不
足方也厥後林清肆逆且夕克殲豫東餘孽迅卽掃蕩而南山匪
徒繼起 特詔領兵大員分途專剿勢不蔓延皆由 燭照幾先
不半載而戡定他如定苗疆戡洋匪 聖武布昭海寓康乂至於
廣開言路籲進賢良有才無德者抑之矯廉曲謹者辨之此尤
知人之哲也矜恤庶獄慎重民命凡內外問刑之吏於罪名稍有
出入必權衡輕重無枉無縱迄今讀 御製慎刑論慎刑續論想
見如天之仁無微不照猶復庫水旱之災興宣防之利賜賑蠲租
動以萬計 六旬正歲普免積逋至二千一百二十九萬有奇恭
儉敦樸出於性成罷珍玩之貢卻供億之煩雖謁 陵秋獮歲以

爲常而屬車所臨 特諭疆吏毋飾官觀擾田疇蓋以展 孝惠
遵 成憲而尤周恤民隱也二十五年中凡典章法制禮樂政刑
無不本之以誠將之以敬於戲盛哉布在方策佑啓雲祚洪庥
康弗祿服教畏神以膺此縣延之祚非 聖人之大德其孰能垂
裕若此哉